

本國學基
叢書
張司業詩集

#812.42

1158

91

書叢本基學國

集詩業司張

撰籍張

行發館書印務商

唐司業張籍詩集序

唐開元盛時。杜甫、李白、高適、儲光義、王維諸賢。至大曆以後。已兩變矣。當時以文名家者。有韓愈、柳宗元、李翱、張籍之徒。相與奮起。振六朝五季漓澆之習。而自成一家人之言。韓昌黎、柳柳州、李協律、韓退之、張司業。按唐史云。有集七卷。不傳。余登進士。同年沁水常倫明卿授以錄本。蓋以乃翁侍郎所藏者。惜不見其全集。所幸有古體七首。今體三百四首。後余於載籍中。又得樂府五七言古詩三十首。自體五言二首。而次編之。共得三百九十三首。夫詩文至五季。壞亦極矣。而元和中。昌黎公特振衰頹。以古文自任。其議論正大。氣象雄偉。可以羽翼六經。而柳宗元得敘事之體。變化莫測。起伏層迭。昔人評其文曰。韓愈之文。出於經。柳宗元之文。出於史。故一時文人響應。而李翱、張籍出入門下。爲昌黎厚友。籍性狷直。率博聞好古。議論勝人。其排佛老。嘗言不能著書。如孟軻、楊雄。以垂世。觀其昌黎代作李浙東一言。議論風生。期待之意甚深。謂其善爲樂府。使人憑几而聽之。未必不若絲竹管絃。敲金擊石也。其送孟東野序曰。孟郊東野始以其詩鳴。高出魏晉。從吾遊者。李翱、張籍其尤也。三子者之鳴。信善鳴矣。抑不知天將和其聲。而使鳴國家之盛邪。抑將窮餓其身。思愁其心腸。而使自鳴其不幸邪。三子之命。則懸于天矣。其在上也。奚以喜。其在下也。奚以悲。韓愈之哀三子之才。至於如此。余并其詩而觀之。其樂府詩。景真情真。有風人之意。而五言近體。又皆勁健清雅。脫落塵想。俱從胸臆中出。然後知昌黎之詩。豐而腴。柳州之詩。峭而勁。司業之詩。新而奇。李翱之詩。悲而壯。卒皆可傳。惟東野之詩。則有窮促寒苦之狀。吾恐溫厚之教。或不若是。

觀者自有巨目。不待余贅言也。今昌黎原道。功業爲唐獨出。血食廟庭。而柳州、李翱、張籍之文。爲世所珍。是和其聲而鳴其盛。非窮悲而自鳴矣。而今而後。知人能文章。其命之遇與不遇。蓋不足悲喜也。張籍。字文昌。和州烏江人。貞元十五年及第。歷官大祝秘書郎。昌黎薦之。遷國子博士。轉水部員外郎。歷主客郎中。卒。授國子司業云。

正德乙亥秋七月。吉河中東峰劉成德序。

張司業集序

翰林學士中書舍人 張洎撰

司業諱籍字文昌和州烏江人也貞元十五年丞相渤海公下及第歷官太祝祕書郎國子博士水部員外郎國子司業公爲古風最善自李杜之後風雅道喪繼其美者唯公一人故白太傅讀公集曰張公何爲者業文三十春尤工樂府詞舉代少其倫又姚秘監嘗讀公詩云妙絕江南曲淒涼怨女詞古風無手敵新語是人知其爲當時文士推服也如此元和中公及元丞相白樂天孟東野譚調天下宗匠謂之元和體又長於今體律詩貞元目前作者間出大抵互相祖尙拘於常態迨公一變而章句之妙冠於流品矣自皇朝多故荐經離亂公之遺集十不存一予自丙午歲迨至乙丑歲相次緝綴僅得四百餘篇藏諸篋笥餘則更俟博訪以廣其遺闕云爾

唐張司業詩集目錄

卷之一

五言古詩

野居

雜怨

七言古詩

寄遠曲

征婦怨

野老歌

送遠曲

猛虎行

牧童詞

求仙行

各東西

讌客詞

唐張司業詩集 目錄

西州

三原李氏園宴集

行路難

白紵歌

寄衣曲

築城詞

別離曲

沙堤行呈裴相公

古斂嘆

節婦吟

永嘉行

探蓮曲

吳宮怨

關山月

白頭吟

賈客樂

車遙遙

朱鷺曲

楚宮行

烏啼引

宛轉行

卷之二

五言律詩

薊北旅思

西樓望月

江陵孝女

漁陽將

傷歌行

北邙行

少年行

將軍行

羈旅行

妾薄命

遠別離

江南行

促促詞

江南春

別鶴

山中古祠

聽夜泉

送南遷客
思遠人
望行人
送越客
思江南舊遊
送遠使
古苑杏花
宿臨江驛
襄國別友
上國贈日南僧
寄友人
律僧
送南客
嶺外逢故人
寄紫閣隱者
古樹

薊北春懷
贈同谿客
送宮人入道
贈辟穀者
夜到漁家
不食姑
送流人
送蠻客
送遠客
征西將
送防秋將
山中秋夜
宿江店
出塞
夜宿黑龍谿
送徐先生歸蜀

隱者

雪谿西亭晚望

答僧拄杖

送韋諝事歸華陰

送海客歸舊島

送新羅使

宿邯鄲館寄馬磁州

送閑師歸江南

登城寄王建

送朱慶餘及第歸越

酬韓庶子

送僧遊五臺兼謁李司空

送李諝事遊越

寄昭王中丞

送人任濟陰

晚秋閑居

送友人歸山

哭山中友人

靈都觀李道士

送閩僧

登咸陽北寺樓

宿廣德寺寄從舅

舟行寄李湖州

遊襄陽山寺

送從弟戴玄往蘇州

過賈島野居

贈姚合少府

送鄭秀才歸寧

閑居

酬孫洛陽

晚春過崔駙馬東園

和裴司業習靜寄所知

酬韓祭酒雨中見寄

酬白二十二舍人早春曲江見招

春日李舍人宅見兩省諸公唱和因書情卽事

早春病中

詠懷

使至藍谿驛寄太常王丞

寄漢陽故人

題李山人幽居

贈太常王建藤杖笋鞋

送李騎曹靈州歸觀

題清徹上人院

使回留別襄陽李司空

和裴司空以詩請刑部白侍郎雙鶴

莊陵挽謠詞三首

經王處士原居

江頭

和裴僕射移官言志

酬裴僕射朝回寄韓吏部

和李僕射秋日病中作

送嚴大夫之桂州

留別江陵王少府

贈海東僧

送安西將

早春閑遊

和周贊善聞子規

寒食夜寄姚侍御

和裴司空卽事通簡舊僚

和吏部令狐尙書喜裴司空見招看雪

同綿州胡郎中清明日對雨西亭宴

和左司元郎中秋居十首

不食仙姑山房

寄孫冲主簿公

贈任懶

春日留別

卷之三

五言排律

和李僕射雨中寄盧嚴二給事

憶盧常侍寄華山鄭隱者

送鄭尚書出鎮南海

省試行不由徑

贈殷山人

問象得玄珠

卷之四

七言律詩

送裴相公赴鎮太原

贈梅處士

謝裴司空寄馬

送李餘及第後歸蜀

舊宮人

沒蕃故人

酬李僕射晚春見寄

和令狐尚書平泉東莊近居李僕射有寄

徐州試反舌無聲

新城甲仗樓

夏日可畏

和李僕射西園

寄元員外

贈王秘書

酌秘書王丞見寄

早朝寄白舍人嚴郾中

書懷寄元郎中

書懷寄王秘書

送揚州判官

贈王司馬

贈令狐博士

贈王秘書

送枝江劉明府

哭胡十八遇

逢王建有贈

送楊少尹赴鳳翔

新除水曹郎答賀

哭元九少府

答白杭州登望圖見寄

送和蕃公主

朝日勅賜櫻桃

和裴司空酬漢城楊少尹

贈僧道

題韋郎中新亭

喜王起侍郎放牒

書懷

送從弟刪東歸

哭丘長史

送從弟徹東歸

贈賈島

移居靜安坊答元八郎中

送韓侍御歸山

送楊少尹赴蒲城

送侯判官赴廣州從軍

贈趙將軍

寒食內宴二首

太白老人

寄和州劉使君

贈商州王使君

寄令狐賓客

寄梅處士

送施肩吾東歸

崑崙兒

贈李杭州

送鄭尙書赴廣州

拜豐陵

贈孔尙書

酬杭州白使君兼寄浙東元大夫

寄蘇州白二十二使君

賀秘書王丞南郊攝將軍

送令狐尙書赴東都留守

送白賓客分司東都

贈閻少保

贈別王侍御赴任陝州司馬

田司空入朝

送浙西周判官

送胡鍊師歸王屋

送韶州林使君

寄王六侍御

送稽亭山寺僧

寄孫洛陽格

送汀洲元使君

胡山歸王屋因有贈

寄處州韓使君

送從弟濛赴饒州

羅道士

寄陸渾趙明府

贈王侍御

同蔣韋二少監贈李郎中

送金少卿副使歸新羅

送李司空赴鎮襄陽

寄白二十二舍人

卷之五

五言絕句

和韋開州居山十二首

梅溪

流杯渠

桃塢

琵琶臺

隱月岫

上士泉餅

寄西峰僧

惜花

涇州塞

岸花

卷之六

送李僕射赴鎮鳳翔

宿雲亭

茶嶺

盤石磴

竹巖

胡蘆沼

繡衣石榻

送遠客

禪師

題暉師影堂

野田

七言絕句

送蜀客

宿山祠

蠻州

寄徐晦

喜王六同宿

與賈島閑遊

哭孟寂

答劉兢

逢故人

送辛少府任安縣

招周居士

送律師歸婺州

送陸師

尋徐道士

憶故州

送元結

美人宮碁

送元宗簡

寄白學士

題玉像堂

哭丘長史

患眼

贈華嚴院僧

送蕭遠弟

贈任道人

送許處士

題楊秘書新居

送僧往金州

答開州韋使君寄車前子

送客遊蜀

送陸暢

贈李司議

登樓寄胡家兄弟

酬藤杖

寄故人

和崔駙馬聞蟬

和長安郭明府與友人縣中會飲

九華觀看花

同韋員外開元觀尋時道士

使行望悟真寺

贈主客劉郎中

秋思

玉仙館

張蕭遠雪夜同宿

宮詞

崔駙馬養鶴

感春

別客

答劉明府

法雄寺東樓

鄰婦哭征夫

和裴僕射看櫻桃花

唐昌觀看花

贈姚合

同韓侍御南谿夜賞

重陽日至峽道

同嚴給事聞唐昌觀玉蕊近有仙過作二首

憶遠

寄府吏

涼州詞三首

華清宮

閑遊

劉兵曹贈酒

春日早朝

寄李渤

同白侍郎杏園贈劉郎中

寄宋景

題渭北寺上人

倡女詞

題僧院

吳楚謠詞

華山廟

寺宿齋

贈王建

楚妃怨

成都曲

春別曲

春詞

送梧州王使君

寄朱闕二山人

尋仙

答鄱陽客藥名詩

寄王奉御

閑遊

答元八遺紗帽

送元八

題方陸上人月臺觀

病中酬元宗簡

贈施肩吾

逢賈島

離官怨

寒塘曲

臺城

浪淘沙詞

傷愚溪二首

楊柳枝詞二首

無題

竹枝詞五首

送客還幽州

隋宮燕

秋山

蠻中

重平驛作

卷之七

樂府三十三首

隴頭燈

秋夜長

董逃行

湘江曲

樵客吟

聽舊宮人穆氏唱歌

宿都庭有懷

堤上行二首

楊柳送客

揚州送客

山禽

玉真觀

贈道士

宿天竺寺寄靈隱寺僧

廢宅行

塞上曲

江村行

白鼉吟

春江曲

唐張司業詩集 目錄

烏棲曲

泗水行

長塘湖

寄葛蒲

憶遠曲

湖南曲

送遠曲

春日行

洛陽行

離婦

惜花

古風二十七首

董公詩

沈千運舊居

寄韓愈

贈姚怱

短歌行

雲重行

雀飛多

山頭鹿

春堤曲

春水曲

楚妃怨

廢瑟詞

懷別

新桃

學仙

懷友

別段生

傷于鵠

和李僕射西園

南歸

贈孟郊

夜懷

野寺後池寄友

病中寄白學士拾遺

岸花

別于鵠

秋山

祭退之

卷之八

一十九首

山中酬人

水

寄靈上人初歸雲門

老將

獻從兄

臥疾

城南

奉和舍人宿直省時思琴

寄別

雨中寄元宗簡

惜花

野艸

山禽

野居

岳州晚景

送安法師

夏日閒居

秋閨

山中春夜

贈項斯

弱柏院僧影堂

聯句

會合聯句

宴興化池亭

薔薇花

謝浙東元尚書見寄
題故僧影堂

春池汎舟
首夏猶清和
西池落泉

唐張司業詩集卷一

五言古詩

唐 國子司業張 籍文昌撰

野居

貧賤易爲適。荒郊亦安居。端坐無餘思。彌樂古人書。秋田多良苗。野水多遊魚。我無耒與耜。安得充廩廚。寒天白日短。簷下煖我軀。四肢漸寬柔。中腸鬱不舒。多病減志氣。爲客足憂虞。況復時節晚。覽景獨踟蹰。羌胡據西州。近甸無邊城。山東收稅租。養我防塞兵。胡騎來無時。居人常震驚。嗟我五陵間。農者罷耘耕。邊頭多煞傷。士卒難全形。郡縣發丁役。丈夫各征行。生男不能養。懼身有姓名。良馬不念秣。烈士不苟營。所願除國難。再逢天下平。

雜怨

切切重切切。秋風桂枝折。人當少年嫁。我當少年別。念君非征行。年年長遠途。妾身甘獨歿。高堂有舅姑。山川豈遙遠。行人自不返。

三原李氏園宴集

暮春天早熱。邑居苦羃煩。言從君子樂。樂彼李氏園。園中有草堂。池引涇水泉。開戶西北望。遠見嵯峨山。

借問主人翁。北州佐戎軒。僕夫守舊宅。爲客施榻筵。高壤有餘滋。竹樹芳且鮮。傾我所持觴。盡日共留連。踈拙不偶俗。常喜形體閑。況來幽棲地。能不重笑言。

七言古詩

寄遠曲

美人來去春江暖。江頭無人湘水滿。浣沙石上水禽栖。江南路長春日短。蘭舟桂楫常渡江。無因重寄鮀瓊瑤。

行路難

湘東行人長嘆息。十年離家歸未得。弊裘羸馬苦難行。僮僕飢寒少筋力。君不見牀頭黃金盡。壯士無顏色。龍蟠泥中未有雲。不能生彼升天翼。

征婦怨

九月匈奴殺邊將。漢軍全沒遼水上。萬里無人收白骨。家家城下招魂葬。婦人依倚子與夫。同居貧賤心亦舒。夫死戰場子在腹。妾身雖存如畫燭。

白紵歌

皎皎白紵白且鮮。將作春衣稱少年。裁縫長短不能定。自持刀尺向姑前。復恐蘭膏汙纖指。常遣傍人收墮珥。衣裳着時寒食下。還把玉鞭鞭白馬。

野老歌一作山農詞

老翁家貧在山住。耕種山田三四畝。苗疎稅多不得食。輸入官倉化爲土。歲暮鋤犂倚空室。呼兒登山收橡實。西江賈客珠百斛。船中養犬長食肉。

寄衣曲

織素縫衣獨苦辛。遠因回使寄征人。官家亦自寄衣去。貴從妾手着君身。高堂姑老無侍子。不得自到邊城裏。慙慙爲看初着時。征夫身上宜不宜。

送遠曲

戲馬臺南山簇簇。山邊飲酒歌別曲。行人醉後起登車。席上回尊勸僮僕。青天漫漫覆長路。遠遊無家安得住。願君到處自題名。他日知君從此去。

築城詞

築城處。千人萬人抱把杵。重重土堅試行錐。軍吏執鞭催作遲。來時一年深磧裏。盡着短衣渴無水。力盡不得休杵聲。杵聲未定人皆死。家家養男當門戶。今日作君城下土。

猛虎行

南山北山樹冥冥。猛虎白日繞林行。向晚一身當道食。山中麋鹿盡無聲。年年養子在空谷。雌雄上山不相逐。谷中近窟有山林。長向村家取黃犢。五陵年少不敢射。空來林下看行迹。

別離曲

行人結束出門去。幾時更踏門前路。憶昔君初納采時。不言身屬遼陽戍。早知今日當別離。成君家計良

爲誰。男兒生身自有役。那得誤我少年時。不如逐君征戰死。誰能獨老空閨裏。

牧童詞

遠牧牛。遠村四面禾黍稠。陂中飢鳥啄牛背。令我不得戲壩頭。入陂草多牛散行。白犢時向蘆中鳴。隔堤吹葉應同伴。還鼓長鞭三四聲。牛羣食草莫相觸。官家截爾頭上角。

沙堤行呈裴相公

長安大道沙爲堤。風吹無塵雨無泥。宮中玉漏下三刻。朱衣導騎丞相來。路傍高樓息歌吹。千車不行行者避。街官闔吏相傳呼。當前十里惟空衢。白麻詔下移相印。新堤未成舊堤盡。

求仙行

漢皇欲作飛仙子。年年採藥東海裏。蓬萊無路海無邊。方士舟中相枕死。招搖在天迴白日。甘泉玉樹無仙實。九皇真人終不下。空向離宮祠太乙。丹田有氣凝素華。君能保之昇絳霞。

古釵嘆

古釵墮井無顏色。百尺泥中今復得。鳳凰宛轉有古儀。欲爲首飾不稱時。女伴傳看不知主。羅袖拂拭生光輝。蘭膏已盡股半折。雕文刻樣無年月。雖離井底入匣中。不用還與墜時同。

各東西

遊人別一東復一西。出門相背兩不返。惟信車輪與馬蹄。道路悠悠不知處。山高海闊誰辛苦。遠遊不定難寄書。日日空尋別時語。浮雲上天雨墮地。暫時會合終離異。我今與子非一身。安得死生不相棄。

節婦吟

君知妾有夫。贈妾雙明珠。感君纏綿意。繫在紅羅襦。妾家高樓連苑起。良人執戟明光裏。知君用心如日月。事夫誓擬同生死。還君明珠雙淚垂。何不相逢未嫁時。

讌客詞

上客不用顧金羈。主人有酒君莫違。請君看取園中花。地上漸多枝上稀。山頭樹影不見石。溪水無風曠更碧。人人齊醉起舞時。誰覺翻衣與倒幘。明朝花盡人已去。此地獨來空繞樹。

永嘉行

黃頭鮮卑入洛陽。胡兒持戟升明堂。晉家天子作降虜。公卿奔走如驅羊。紫陌旌旛暗相觸。家家雞犬驚上屋。婦人出門隨亂兵。夫死眼前不敢哭。九州諸侯自顧土。無人領兵來護主。北人避胡皆在南。南人至今能晉語。

採蓮曲

秋江岸邊蓮子多。採蓮女兒凭船歌。青房圓實齊戢戢。爭前競折漾微波。試牽綠莖不尋藕。斷處絲多刺傷手。白練束腰袖半卷。不插玉釵粧梳淺。船中未滿度前洲。借問阿誰家住遠。歸時共待暮潮上。自弄芙蓉還蕩漿。

傷歌行

黃門詔下促收捕。京兆尹繫御史府。出門無復部曲隨。親戚相逢不容語。辭成謫慰南海州。受命不得須臾。

史留身著青衫騎惡馬。東門之外無送者。郵夫防吏急喧驅。往往驚墮馬蹄下。長安里中荒大宅。朱門已除十二戟。高堂舞榭鑲管絃。美人遙望西南天。

吳宮怨

吳宮四面秋水。江清露白芙蓉死。吳王醉後欲更衣。座上美人嬌不起。宮中千門復萬戶。君恩反復誰能數。君心與妾既不同。徒向君前作歌舞。茱萸滿宮紅實垂。秋風嫋嫋生繁枝。姑蘇臺上夕燕罷。它人侍寢還獨歸。白日在天光在地。君今那得長相棄。

北邙行

洛陽北門北邙道。喪車轆轤入秋草。車前齊唱薤露歌。高墳新起日峨峨。朝朝暮暮人送葬。洛陽城中人更多。千金立碑高百尺。終作誰家柱下石。山頭松柏半無主。地下白骨多於土。寒食家家送紙錢。烏鵲作窠啣上樹。人居朝市未解愁。請君暫向北邙遊。

關山月

秋月明朗關山上。山中行人馬蹄響。關山秋來雨雪多。行人見月唱邊歌。海邊茫茫天氣白。胡兒夜度黃龍磧。軍中探騎暮出城。伏兵暗處低旌戟。沙磧連天霜草平。野駝尋水磧中鳴。隴頭風急鴈不下。沙場苦戰多流星。可憐萬里關山道。年年戰骨多秋草。

少年行

少年從獵出長楊。禁中新拜羽林郎。獨到輦前射雙虎。君王手賜黃金璫。日日闔閭都市裏。贏得寶刀重

刻字百里報讐夜出城。平明還在娼樓醉。遙聞虜到平陵下。不待詔書行上馬。斬得名王獻桂宮。封侯起第一日中。不同六郡良家子。百戰始取邊城功。

白頭吟

請君膝上琴。彈我白頭吟。憶昔君前嬌笑語。兩情宛轉如縈素。宮中爲我起高樓。更開花池種芳樹。春天百草秋始衰。棄我不待白頭時。羅襦玉珥色未暗。今朝已道不相宜。揚州青銅作明鏡。暗中持照不見影。人心回互自無窮。眼前好惡那能定。君恩已去若再返。菖蒲花開月長滿。

將軍行

彈箏峽東有胡塵。天子擇日拜將軍。蓬萊殿前賜六蠶。還領禁兵爲部曲。當朝受詔不辭家。夜向咸陽原上宿。戰車彭彭旌旗動。三十六軍齊上隴。隴頭戰勝夜亦行。分兵處處收舊城。胡兒殺盡陰磧暮。擾擾嗚有牛羊聲。邊人親戚曾戰沒。今逐官軍收舊骨。磧西行見萬里空。幕府獨奏將軍功。

賈客樂

金陵向西賈客多。船中生長樂風波。欲發移船近江口。船頭祭神各澆酒。停杯共說遠行期。入蜀經蠻誰別離。金多衆中爲上客。夜夜篝緡眠獨遲。秋江初月猩猩語。孤帆夜發瀟湘渚。水工持櫂防暗灘。直過山邊及前侶。年年逐利西復東。姓名不在縣籍中。農夫稅多長辛苦。棄業寧爲販寶翁。

羈旅行

遠客出門行路難。停車欽策在門端。荒城無人霜滿路。野火燒橋不得度。寒蟲入窟鳥歸巢。僮僕問我誰

家去行尋田頭暝未息。雙轂長轅礙荆棘。緣岡入澗投田家。主人舂米爲夜食。晨雞喔喔茆屋傍。行人起掃車上霜。舊山已別行已遠。身計未成難復返。長安陌上相識稀。遙望天門白日晚。誰能聽我辛苦行。爲向君前歌一聲。

車遙遙

征人遙遙出古城。雙輪齊動駟馬鳴。山川無處不歸路。念君長作萬里行。野田人稀秋草綠。日暮放馬車中宿。驚麕游兔在我傍。獨唱鄉歌對僮僕。君家大宅鳳城隅。年年道上隨行車。願爲玉鑾繫華軾。終日有聲在君側。門前舊路久已拋。無由復得君消息。

妾薄命

薄命嫁得良家子。無事從軍去萬里。漢家天子平四夷。護羌都尉裹屍歸。念君此行爲死別。對君裁縫泉下衣。與君一日爲夫婦。千年萬歲亦相守。君愛龍城征戰功。妾願青樓歌樂同。人生各各有所欲。詎得將心入君腹。

朱鷺

翩翩兮朱鷺來。汎春塘。栖綠樹。羽毛如翦色如染。遠飛欲下雙翅斂。避人引子入深壑。動處水紋開。澹澹誰知豪家網。爾軀不如飲啄江海隅。

遠別離

蓮葉團團荇葉折。長江鯉魚鱗亦赤。念君少年棄親戚。千里萬里獨爲客。誰言遠別心不易。天星墜地能

爲石幾時斷得城南陌勿使居人有行役

楚宮行

章華宮中九月時。桂花未落紅橋垂。江頭騎火照輦道。君王夜從雲夢歸。霓旌鳳蓋到雙闕。臺上重重歌吹發。千門萬戶開相當。燭籠左右列成行。下輦更衣入洞房。洞房侍女盡焚香。玉階羅幃微有霜。齊言此夕樂未央。玉酒湛湛盈華觴。絲竹次第鳴中堂。巴姬起舞向君王。迴身垂手結明璫。願君千年萬年壽。朝出射麋夜飲酒。

江南曲

江南人家多橘樹。吳姬舟上織白苧。土地卑濕饒蟲蛇。連木爲牌入江住。江村亥日長爲市。落帆度橋來浦裏。清莎覆城竹爲屋。無井家家飲潮水。長干午日沽春酒。高高酒旗懸江口。娼樓兩岸懸水柵。夜唱竹枝留北客。江南風土歡樂多。悠悠處處盡經過。

烏啼引

秦烏啼啞啞。夜啼長安吏人家。吏人得罪囚在獄。傾家賣產將自贖。少婦起聽夜啼烏。知是官家有赦書。下床心喜不重寐。未明上堂賀舅姑。少婦語啼烏。汝啼慎勿虛。借汝庭樹作高窠。年年不令傷爾雛。

促促詞

促促復促促。家貧夫婦慳不足。今年爲人送租船。去年捕魚向江邊。家中姑老子復小。自執吳綃輸稅錢。家家桑麻滿地黑。念君一身空努力。願教牛蹄團團一角直。君身常在應不得。

宛轉行

華屋重翠幃。綺席雕象床。遠漏微更疎。薄衾中夜涼。爐氣暗徘徊。寒燈背斜光。妍姿結宵態。寢覺幽夢長。宛轉復宛轉。憶君更未央。

唐張司業詩集卷二

五言律詩

薊北旅思

日日望鄉國。空譔白苧詞。長因送人處。憶得別家時。失意還獨語。多愁祗自知。客亭門外柳。折盡向南枝。

江南春

江南楊柳春。日暖地無塵。渡口過新雨。夜來生白蘋。晴沙鳴乳燕。芳樹醉遊人。向晚青山下。誰家祭水神。

西樓望月

城西樓上月。復是雪晴時。寒夜共來望。思鄉獨下遲。幽光落水慙。淨色遍霜枝。明日千里去。此中還別離。

別鶴

雙鶴出雲谿。分飛各自迷。空巢在松頂。折羽落江泥。尋水終不飲。逢林亦未栖。別離應易老。萬里兩淒淒。

江陵孝女

孝女獨垂髮。少年唯一身。無家空托墓。主祭不從人。相吊有行客。起廬因舊隣。江頭聞哭處。寂寂楚花春。

山中古祠

春草空祠墓。荒林唯鳥飛。記年碑石在。經亂祭人稀。野鼠緣朱帳。陰塵蓋畫衣。近來潭水黑。時見宿龍歸。

漁陽將

塞深沙草白。都護領燕兵。放火燒奚帳。分旗築漢城。下營看嶺勢。尋雪覺人行。更向桑乾北。擒生問磧名。

聽夜泉

細泉深處落。夜久漸聞聲。獨起出門聽。欲尋當澗行。還疑隔林遠。復畏有風生。月下長來此。無人亦到明。

送南遷客

去去遠遷客。瘴中衰病身。青山無限路。白首不歸人。海國戰騎象。蠻州市用銀。一家分幾處。誰見日南春。

薊北春懷

渺渺水雲外。別來音信稀。因逢過江使。卻寄在家衣。問路更愁遠。逢人空說歸。今朝薊城北。又見塞鴻飛。

思遠人

野橋春水清。橋上送君行。去去人應老。年年草自生。出門看遠道。無信向邊城。楊柳別離處。秋蟬今復鳴。

贈同谿客

幽居得相近。煙景每寥寥。共伐臨谿樹。同爲過水橋。自教青鶴舞。分採紫芝苗。更愛南峰住。尋君路恐遙。

望行人

秋風窻下起。旅鴈向南飛。日日出門望。家家行客歸。無因見邊使。空待寄寒衣。獨倚青樓暮。煙深鳥雀稀。

送宮人入道

舊寵昭陽裏。尋仙此最稀。名初出宮籍。身未稱霞衣。已別歌舞貴。長隨鸞鶴飛。中官看入洞。空駕玉輪歸。

送越客

見說孤帆去，東南到會稽。春雲剡溪口，殘月鏡湖西。水鶴沙邊立，山鷗竹裏啼。謝家曾住處，煙洞入應迷。
贈辟穀者

學得淩霞法，逢人與小還。身輕曾試鶴，力弱未離山。無食犬猶在，不耕牛自閑。朝朝空漱水，叩齒草堂間。
思江南舊遊

江臯三月時，花發石楠枝。歸客應無數，春山自不知。獨行愁道遠，迴信畏家移。楊柳東西度，茫茫欲問誰。
夜到漁家

漁家在江口，潮水入柴扉。行客欲投宿，主人猶未歸。竹深村路遠，一作暗月出釣船稀。遙見尋沙岸，春風動草衣。

送邊使

揚旌過隴頭，隴水向西流。塞路依山遠，戍城逢雨秋。寒沙陰漫漫，疲馬去悠悠。爲問征行將，誰封定遠侯。
不食姑

幾年山裏住，已作綠毛身。護氣常稀語，存思自見神。養龜同不食，留藥任生塵。要問西王母，仙中第幾人。
古苑杏花

廢苑杏花在，行人愁到時。獨開新塹底，半露舊燒枝。晚色連荒轍，低陰覆折碑。茫茫古陵下，春盡又誰知。
送流人

獨向長城北，黃雲暗塞天。流名屬邊將，舊業作公田。擁雪添軍壘，收冰當井泉。知君住應老，須記別鄉年。

宿臨江驛

楚驛南渡口，夜深來客稀。月明見潮上，江靜覺鷗飛。旅宿今已遠，此行猶未歸。離家久無信，又聽搗寒衣。

送蠻客

借問炎州客，天南幾日行。江連惡谿路，山遠夜郎城。椰葉瘴雲濕，桂叢蠻鳥聲。知君卻迴日，記得海花名。

襄國別友

曉色荒城下，相看秋草時。獨遊無定計，不欲道來期。別處去家遠，愁中驅馬遲。歸人渡煙水，遙映野棠枝。

送遠客

南原相送處，秋水草還生。同作憶鄉客，如今分路行。因誰寄歸信，漸遠問前程。明日重陽節，無人上古城。

一作秋草水邊生

上國贈日南僧

獨向雙峰老，松門閉兩涯。翻經依貝葉，掛衲落藤花。磬石新開井，穿林自種茶。時逢海南客，蠻語問誰家。

征西將

黃沙北風起，半夜又翻營。戰馬雪中宿，探人冰上行。深山旗未展，陰磧鼓無聲。幾道征西將，同收碎葉城。

寄友人

憶在江南日，同遊三月時。採茶尋遠澗，鬪鴨向春池。送客沙頭宿，招僧竹裏碁。如今各千里，無計得相隨。

送防秋將

白首征西將。猶能射戟支。元戎選部曲。軍吏換旌旗。逐虜招降遠。開邊舊壘移。重收隴外地。應似漢家時。

律僧

苦行長不出。清羸最少年。持齋唯一食。講律豈曾眠。避草每移徑。濾蟲還入泉。從來天竺法。到此幾人傳。

山中秋一作春夜

寂寂山一作春景靜。幽人歸去一作眠遲。橫琴當月下。壓酒及花時。冷一作新露濕茆屋。暗泉衝竹籬。西峰採藥伴。此夕恨無期。

送南客

行路雨脩脩。青山盡海頭。天涯人去遠。嶺北水空流。夜市連銅柱。巢居屬象州。來時舊相識。誰向日南遊。

宿江店

野店臨西浦。門前有橘花。停燈待賈客。賣酒與漁家。夜靜江水白。路廻山月斜。閑尋泊船處。潮落見平沙。

嶺外逢故人

過嶺萬餘里。旅遊經此稀。相逢去家遠。共說幾時歸。海上見花發。瘴中唯鳥飛。炎州望鄉伴。自識北人衣。

出塞

秋塞雪初下。將軍遠出師。分營長記火。放馬不收旗。月冷邊帷濕。沙昏夜探遲。征人皆白首。誰見滅胡時。

寄紫閣隱者

紫閣氣沉沉。先生住處深。有人時得見。無路可相尋。夜鹿伴茅屋。秋猿守栗林。唯應採靈藥。更不別營心。

夜宿黑竈谿

夜到碧谿裏，無人秋月明。逢幽更移宿，取伴亦探行。花下紅泉色，雲西乳鶴聲。明朝記歸處，石上自書名。

古樹

古樹枝柯少，枯來復幾春。露根堪繫馬，空腹恐藏人。蠹節莓苔老，燒痕霹靂新。若當江浦上，行客祭爲神。

送徐先生歸蜀

日暮遠歸處，雲間仙觀鐘。唯持青玉牒，獨立碧雞峰。陰洞一作長收乳，寒潭舊養龍。幾時因賣藥，得向海邊逢。

隱者

先生已得道，市井亦容身。救病自行藥，得錢多與人。問年長不定，傳法又非真。常見鄰家翁，一作說時聞一作時使鬼神。

送友人歸山

出山成北首，重去結茅廬。移石脩廢井，掃竈盛舊書。開田留杏樹，分洞與僧居。長在幽峰裏，樵人見亦疎。

雪谿西亭晚望

雪水碧悠悠，西亭柳岸頭。夕陰生遠岫，斜照逐迴流。此地動歸思，逢人方倦遊。吳興蒼舊盡，空見白蘋洲。

哭山中友人

天雲遙便哭，山友隔今生。遶墓招魂魄，鑄巖記姓名。犬因無主善，鶴爲見人鳴。長說能尸解，多應別路行。

答僧拄杖

靈藤爲拄杖。白淨色如銀。得自高僧手。將扶病客身。春遊不騎馬。夜會亦呈人。持此歸山去。深宜戴角巾。

靈都觀李道士

山觀雨來靜。遶房瓊草春。素書天上字。花洞古時人。泥竈養靈液。掃壇朝玉真。幾迴遊閬苑。青節亦隨身。

送韋評事歸華陰

三峯西面住。出見世人稀。老大誰相識。恓惶又獨歸。掃廬秋菌落。開簾夜蛾飛。若向一作訪雲中伴。還應着褐衣。

送閩僧

幾夏京城住。今朝獨遠歸。修行四分律。護淨七條衣。谿寺黃橙熟。沙田紫芋肥。九龍潭上路。同去客應稀。

送海客歸舊島

海上去應遠。蠻家雲島孤。竹船來桂府。山市賣魚鬚。入國自獻寶。逢人多贈珠。卻歸春洞口。新一作象祭天吳。

登咸陽北寺樓

高秋原上寺。下馬一登臨。渭水西來直。秦山南去深。舊宮人不住。荒碣路難尋。日暮涼風起。蕭條多遠心。

送新羅使

萬里爲朝使。離家今幾年。應知舊行路。卻上遠歸船。夜泊避蛟窟。朝炊求島泉。悠悠到鄉國。還望海西天。

宿廣德寺寄從舅

古寺客堂空。開簾四面風。移床動栖鶴。停燭聚飛蟲。閑臥逐涼處。遠愁生靜中。林西微月色。思與甯家同。

宿邯鄲館寄馬磁州

孤客到空館。夜寒愁臥遲。雖沾主人酒。不似在家時。幾宿得歡笑。如今成別離。明朝行更遠。迴望隔山陂。

舟行寄李湖州

客愁無次第。川路重辛勤。藻密行舟澁。灣多轉櫂頻。薄遊空感惠。失計自憐貧。賴誦汀洲句。時時慰遠人。

送閔師歸江南

偏住江南寺。隨緣到上京。多生修律業。外學得詩名。講殿偏追入。齋家別請行。青楓鄉路遠。幾日盡歸程。

遊襄陽山寺

秋色江邊路。煙霞若有期。寺貧無利施。僧老足慈悲。薜荔侵禪室。蝦蟆占浴池。閑遊殊未徧。卽是下山時。

登城寄王建

聞君鶴嶺住。西望日依依。遠客偏相憶。登城獨不歸。十年爲道侶。幾處共柴扉。今日煙霞外。人間得見稀。

送從弟戴玄往蘇州

楊柳閨門路。悠悠水岸斜。乘舟向山寺。着屐到漁家。夜月紅柑樹。秋風白藕花。江天詩景好。迴日莫令賒。

送朱慶餘及第歸越

東南歸路遠。幾日到鄉中。有寺山皆遍。無家水不通。湖聲蓮葉雨。野氣稻花風。州縣知名久。爭邀與客同。

過賈島野居

青門坊外住。行坐見南山。此地去人遠。知君終日閑。蛙聲籬落下。草色戶庭間。好是經過處。唯愁暮獨還。

酬韓庶子

西街幽僻處。正與懶相宜。尋寺獨行遠。借書常送遲。家貧無易事。身病是閑時。寂寞誰相問。祇應君自知。

贈姚合少府

病來辭赤縣。案上有丹經。爲客燒茶竈。教兒掃竹亭。詩成添舊卷。酒盡臥空甌。闕下今遺逸。誰瞻隱士星。

送僧遊五臺兼謁李司空

遠去見雙節。因行上五臺。化樓侵曉出。雪路向春開。邊寺連烽去。胡兒聽法來。定知巡禮後。解夏始應迴。

送鄭秀才歸寧

桂櫂彩爲衣。行當令節歸。夜潮迷浦遠。晝雨見人稀。野艾到時熟。江鷗泊處飛。離琴一奏罷。山雨靄餘暉。

送李評事遊越

未習風塵事。初爲吳越遊。露沾湖草濕。一作日照海山秋。梅市門何在。蘭亭水尚流。西陵待潮處。知汝不勝愁。

閑居

東城南陌塵。紫幃與朱輪。盡說無多事。能閑有幾人。唯教推甲子。不信守庚申。誰見衡門裏。終朝自在貧。

寄昭應王中丞

借得西街宅。開門渭水頭。長貧唯要健。漸老不禁愁。獨凭藤書案。空懸竹酒鉤。春風石甕寺。作意共君遊。

酬孫洛陽

家貧相遠住。齋館入時稀。獨坐看書卷。閑行着褐衣。早蟬庭笋老。新雨徑莎肥。各離爭名地。無人見是非。

送人任濟陰

黃綬在陰下。知君非旅行。將書報舊里。留褐與諸生。贈別盡沽酒。惜歡多出城。春風濟水上。候吏聽車聲。

晚春過崔駙馬東園

閑園多好風。不意在街東。早早詩名遠。長長酒性同。竹香新雨後。鶯語落花中。莫遣經過少。年光漸覺空。

夏日閑居

多病逢迎少。閑居又一年。藥看辰日合。茶過卯時煎。草長晴來地。蟲飛晚後天。此時幽步遠。不覺到山邊。

晚秋閑居

獨坐高秋晚。蕭條是遠思。家貧長畏客。身老轉憐兒。萬種盡閑事。一生能幾時。從來疎懶性。應祇有僧知。

和裴司業習靜寄所知

幽室獨焚香。清晨下未央。山開登竹閣。僧到出茶堂。收拾新琴譜。尋封舊藥方。逍遙無別事。不似在班行。

酬韓祭酒雨中見寄

雨中愁不出。陰黑盡連宵。屋濕唯添漏。泥深未放朝。無芻憐馬瘦。少食信兒嬌。聞道韓夫子。還同此寂寥。

和裴僕射移官言志

身在勤勞地，常思放曠時。功成歸聖主，位重委羣司。看壘臺邊石，閑吟篋裏詩。蒼生正瞻望，難與故山期。

酬白二十二舍人早春曲江見招

曲江冰欲盡，風日已恬和。柳色看猶淺，泉聲覺漸多。紫蒲生濕岸，青鴨戲新波。仙掖高情客，相招共一過。

酬裴僕射朝回寄韓吏部

獨愛南關裏，山晴竹杪風。從容朝早退，蕭洒客常通。案曲新亭上，移花遠寺中。唯應有吏部，詩酒每相同。

春日李舍人宅見兩省諸公唱和因書情卽事

又見帝城裏，東風天氣和。官閑人事少，年長道情多。紫掖發章句，青闈更詠譌。誰知余寂寞，終日斷經過。

和李僕射秋日病中作

由來病根淺，易見藥功成。曉日杵臼靜，涼風衣服輕。猶疑少氣力，漸覺有心情。獨倚紅藤杖，時時塔上行。

早春病中

羸病及年初，心情不自如。多申請假牒，祇送賀官書。幽徑獨行步，白頭長懶梳。更憐晴日色，漸漸暖貧居。

送嚴大夫之桂州

旌旆過湘潭，幽奇得徧探。莎城百越北，行路九疑南。有地多生桂，無時不養蠶。聽譌難辨曲，風俗自相諳。

詠懷

老去多悲事，非唯見二毛。眼昏書字大，耳重語聲高。望月偏增思，尋山覺發勞。都無作官意，賴得在閑曹。

使至藍谿驛寄太常王丞

獨上七盤去。峰巒轉轉稠。雲中迷象鼻。雨裏下箏頭。水沒荒橋路。鴉啼古驛樓。君今在城闕。肯見此中愁。

留別江陵王少府
迢迢山上路。病客獨行遲。況此分襟日。當君失意時。寒林露遠驛。晚燒獵荒陂。別後空迴首。相逢未有期。

贈海東僧
別家行萬里。自說過扶餘。學得中州語。能爲外國書。與醫收海藥。持呪取龍魚。更問同來伴。天台幾處居。

寄漢陽故人
知君漢陽住。煙樹遠重重。歸使雨中發。寄書燈下封。同時買江塢。今日別雲松。欲問新移處。青蘿最北峰。

送安西將
萬里海西路。茫茫邊草秋。計程沙塞口。望伴驛峰頭。雪暗非時宿。沙深獨去愁。塞鄉人易老。莫住近番州。

題李山人幽居
襄陽南郭外。茅屋一書生。無事焚香坐。有時尋竹行。畫苔藤杖細。踏石笋鞋輕。應笑風塵客。區區逐世名。

早春閑遊
年長身多病。獨宜作冷官。從來閑坐慣。漸覺出門難。樹影新猶薄。池光晚尙寒。遙聞有花發。騎馬暫行看。

贈太常王建藤杖笋鞋
蠻藤剪爲杖。楚笋結成鞋。稱與詩人用。甚隨禮寺齋。尋花入幽徑。步日下寒階。以此持相贈。君應愜素懷。

和周贊善聞子規

秦城啼楚鳥，遠思更紛紛。況是街西夜，偏當雨裏聞。應投最高樹，似隔數重雲。此處誰能聽，遙知獨有君。

送李騎曹靈州歸覲

翩翩出上京，幾日到邊城。漸覺風沙起，還將弓箭行。席箕侵路暗，野馬見人驚。軍府知歸慶，應教數騎迎。

寒食夜寄姚侍御

貧官多寂寞，不異野人居。作酒和山藥，教兒寫道書。五湖歸去遠，百事病來疎。況憶同懷者，寒庭月上初。

題清微上人院

古寺臨壇久，松間別起堂。看添浴佛水，自合讀經香。愛養無家客，多傳得効方。遇齋長不出，坐臥一繩床。

和裴司空卽事通簡舊僚

肅肅上台坐，四方皆仰風。當朝奉明政，早日立元功。獨對赤墀下，密宣黃閣中。猶聞動高韻，思與舊僚同。

使回留別襄陽李司空

江亭寒日晚，絃筦有離聲。從此一筵別，獨爲千里行。遲遲戀恩德，役役恨公程。迴首吟新句，霜雲滿楚城。

和戶部令狐尙書喜裴司空見招看雪

南園新覆雪，上宰曉來看。誰共登春榭，唯聞有地官。色連山遠靜，氣與竹偏寒。高韻更相應，寧同謠吹歡。

和裴司空以詩請刑部白侍郎雙鶴

皎皎仙山鶴，遠留閑宅中。徘徊幽榭月，嘹唳小亭風。丞相西園好，池塘夜水通。從君求置此，賞望與賓同。

同綿州胡郎中清明日對雨西亭宴

郡內開新火。高齋雨氣清。惜花邀客賞。勸酒促譚聲。共醉移芳席。留歡閉暮城。政閑方宴語。琴筑任遙情。

莊陵挽詞三首

白日已昭昭。干戈亦漸消。迎師新出道。從諫早臨朝。佞倖威權薄。忠良寵錫饒。丘陵今一變。無復白雲謠。

二

觀風欲巡洛。習戰且開池。始改三年政。旋開七月期。陵分內外使。官具吉凶儀。渭北新園路。蕭笳遠更悲。

三

曉日龍車動。秋風閭闔開。行帷六宮出。執紼萬方來。慘慘郊原暮。遲遲挽唱哀。空山煙雨夕。新栢遶陵臺。

和左司元郎中秋居十首

選得閑坊住。秋來樹木肥。風前卷筒簾。雨裏脫荷衣。野客留方去。山童取藥歸。非因入朝省。過此出門稀。

二

有地唯栽竹。無池亦養鵝。學書求墨跡。釀酒愛朝和。古鏡銘文淺。神方謎語多。居貧閑自樂。豪客莫相過。

三

閑來松菊地。未省有埃塵。直去多將藥。朝回不訪人。見僧收酒器。迎客換紗巾。更恐登清要。難成自在身。

四

自知清靜好。不要問時豪。就石安琴枕。穿松厭酒槽。山情因月甚。詩語入秋高。身外無餘事。唯應筆硯勞。

五

六 閑堂新掃洒。稱是早秋天。書客多呈帖。琴僧與合絃。莎臺乘晚上。竹院就涼眠。終日無忙事。還應似得仙。

七 醉倚斑藤杖。閑眠瘦木牀。案頭行氣訣。爐裏降真香。尙儉經營少。居閑意思長。秋茶莫夜飲。新自作松漿。

八 每憶舊山居。新教上墨圖。晚花迴地種。好酒問人沽。夜後開朝簿。申前發省符。爲郎凡幾歲。已見白髭鬚。

九 菊地纔通屐。茶房不疊階。憑醫看蜀藥。寄信覓吳鞋。盡得仙家法。多隨道客齋。本無榮辱意。不是學安排。

十 林下無拘束。閑吟放性靈。好時閑藥竈。高處置琴亭。更撰居山記。唯尋相鶴經。初當授衣假。無吏挽門鈴。

經王處士原居 客散高齋晚。東園景象偏。晴明猶有蝶。涼冷漸無蟬。簾折霜來子。蝸行雨後涎。新詩纔上卷。已得滿城傳。

不食仙姑山房 舊宅誰相近。唯僧近竹關。庭閑雲滿井。窻曉雪通山。來客半留宿。借書多寄還。明時未中歲。莫便一生閑。

江頭 寂寂花枝裏。草堂唯素琴。因山曾改眼。見客不言心。月出溪路靜。鶴鳴雲樹深。丹砂如可學。便欲住幽林。

晚步隨江遠。來帆過眼頻。試尋新住客。少見故鄉人。
回首憐歸翼。長吟任此身。應同南浦鴈。更見嶺頭春。
寄孫冲主簿公。

低折滄洲簞。無書整兩春。馬從同事借。妻怕罷官貧。
道僻收閑藥。詩高笑古人。仍聞長吏奏。表乞鎖廳頻。
贈任懶。

未肯求科第。深坊且隱居。勝遊尋野客。高臥看兵書。
點藥醫閑馬。分泉灌遠蔬。漢庭無得意。誰擬薦相如。
舊宮人。

謠舞梁州女。歸時白髮生。全家沒蕃地。無處問鄉程。
宮錦不傳樣。御香空記名。一身難自說。愁逐路人行。
春日留別。

遊人欲別離。醉復對花枝。看卻春人晚。莫輕少年時。
臨行記分處。回首是相思。各向天涯去。重來未有期。
沒蕃故人。

前年伐月支。城上沒全師。蕃漢斷消息。死生長別離。
無人收廢帳。歸馬識殘旗。欲祭疑君在。天涯哭此時。

唐張司業詩集卷三

五言排律

和李僕射雨中寄盧嚴二給事

郊原飛雨至。城闕濕雲埋。迸點時穿牖。浮漚欲上階。偏滋解籜竹。併灑落花槐。晚潤生琴匣。新涼滿藥齋。從容朝務退。放曠掖曹乖。盡日無來客。閑吟感所懷。

酬李僕射晚春見寄

戟戶動初晨。鶯聲雨後頻。虛庭清氣在。衆藥濕光新。魚動芳池面。苔侵老竹身。教鋪膏酒處。自問探花人。獨此長多病。幽居欲過春。今朝聽高韻。忽覺離埃塵。

憶盧常侍寄華山鄭隱者

獨住三峰下。年深學煉丹。一間松葉屋。數片石花冠。酒待山中飲。琴將洞里彈。開門移遠竹。剪草出幽蘭。荒壁通泉架。晴崖曬藥壇。寄知騎省客。長向白雲看。

和令狐尙書平泉東莊近居李僕射有寄

平地有清泉。伊南古寺邊。漲池閑遶屋。出野徧澆田。舊隱離多日。新鄰得幾年。探幽皆一絕。選勝又雙全。門靜山光別。園深竹影連。斜分採藥徑。直過釣魚船。雞犬還應識。雲霞頓覺鮮。追思應不遠。賞愛諒難偏。此處堪長往。遊人早共傳。各當恩寄重。歸臥恐無緣。

送鄭尙書出鎮南海

遠鎮承新命。王程不假催。班行爭路送。恩賜併時來。牙旆從城展。兵符到府開。蠻聲喧夜市。海色浸潮臺。畫角天邊月。寒關嶺上梅。共知公望重。多是隔年迴。

徐州試反舌無聲

夏木多好鳥。偏知反舌名。林幽還共宿。時過卽無聲。竹外天空曉。谿頭雨自晴。居人宜寂寞。深院益淒清。入霧暗相失。當風閑易驚。來年上林苑。知爾最先鳴。

省試行不由徑

田裏有微徑。賢人不復行。孰知求捷步。又恐異端生。從易衆所欲。安邪患亦生。誰能達大道。共此竟前程。子羽有遺跡。孔門傳舊聲。今逢大君子。士節自光明。

新城甲仗樓

謝守起新樓。西臨城角頭。圖功百仗麗。藏器五兵脩。結構樓臺固。虛明戶檻幽。魚龍卷旗幟。霜雪積戈矛。暑雨焞蒸隔。涼風宴位留。地高形出沒。山靜氣清優。睥睨斜光徹。欄干宿靄浮。芊芊秔稻色。脉脉苑谿流。郡化王丞相。詩成沈隱侯。居茲良得意。殊勝峴山遊。

贈殷山人

薜蘿山中客。知名四十年。恣懷身獨隱。寂寞性應便。世業公侯籍。生涯黍稷田。藤懸讀書帳。竹繫網魚船。已種千頭橘。新開數脉泉。閑遊攜酒遠。幽語向僧偏。入洞題松過。看花選石眠。避喧長汨沒。逢勝卽留連。

自古多高跡。如君少比肩。耕耘既辛苦。章句已流傳。昔日交遊盛。當時省閣賢。同袍還共弊。連轡每推先。講序居重席。羣儒願執鞭。滿堂虛左待。衆目望喬遷。才異時難用。情高道自全。畏人顏慘澹。踈物勢連連。達者聞知命。吾生復禮玄。深藏報恩劍。久緝養生篇。樵悴衆夫笑。經過郡守憐。夕陽悲病鶴。霜氣動飢鴈。處士誰能薦。窮途世所捐。伯鸞甘寄食。元淑苦無錢。策蹇秋塵裏。吟詩黃葉前。故裘餘白領。廢瑟斷朱絃。志氣終猶在。逍遙任自然。家貧念婚嫁。身老戀雲煙。放逸栖巖鹿。清虛飲露蟬。鄭逃秦谷口。嚴愛越溪邊。霄漢予猶阻。榮枯子不牽。山城一相遇。感激意難宣。

夏日可畏

赫赫溫風扇。炎炎夏日徂。火威馳迥野。畏景鑠遙途。勢矯翔陽翰。功分造化爐。禁城千品獨。黃道一輪孤。落照頻空輦。餘暉卷夕梧。如何倦遊子。中路獨踟蹰。

罔象得玄珠

赤水今何處。遺珠已渺然。離婁徒肆目。罔象乃通玄。皎潔因成性。圓明不在泉。暗中看夜色。塵外照晴田。無脛真難掬。懷疑寶易遷。今朝搜擇得。應免媚晴川。

和李僕射西園

遇午歸閑處。西庭敞四簷。高眠著瑟枕。散帙檢書籤。印在休通客。山晴好捲簾。竹涼蠅到少。藤暗蝶爭潛。曉一作晚鵲頻驚喜。踈蟬不許拈。石苔生紫點。欄藥吐紅尖。虛坐詩情遠。幽探道侶兼。所營尙勝地。雖儉復誰嫌。

唐張司業詩集卷四

七言律詩

送裴相公赴鎮太原

盛德雄名遠近知。功高先乞守藩維。御恩暫遣分龍節。署勅還同在鳳池。天子親臨樓上送。朝官齊出道邊辭。明年塞北清蕃落。應建生祠請立碑。

寄元員外

外郎直罷無餘事。掃洒書堂試藥爐。門巷不教當要鬧。詩篇轉覺足功夫。月明臺上唯僧到。夜靜坊中有酒沽。朝省入頻閑日少。可能同伴舊遊無。

贈梅處士

早聞聲價滿京城。頭白江湖放曠情。講易自傳新註義。題詩不着舊官名。近移馬跡山前住。多向牛頭寺裏行。天子如今議封禪。應將束帛請先生。

贈王秘書

不曾浪出謁公侯。唯向花間水畔遊。每着新衣看藥竈。多收古器在書樓。有官祗作山人老。平地能開洞穴幽。自領閑司了無事。得來君處喜相留。

謝裴司空寄馬

驟耳新駒駿得名。司空遠自寄書生。乍離華廐移蹄澁。初到貧家舉眼驚。每被閑人來借問。多尋古寺獨騎行。長思歲旦沙堤上。得從鳴珂傍火城。

酬祕書王丞見寄

相看頭白來城闕。卻憶漳谿舊往還。今體詩中偏出格。常參官裏每同班。街西借宅多臨水。馬上逢人亦說山。芸閣水曹雖最冷。與君長喜得身閑。

送李餘及第後歸蜀

十年人好誦詩章。今日成名出舉場。歸去唯將新誥牒。後來爭取舊衣裳。山橋曉上蕉花暗。水店晴看芋草黃。鄉里親情相見日。一時攜酒賀高堂。

早朝寄白舍人嚴郎中

鼓聲初動未聞雞。羸馬街中踏凍泥。燭暗有時衝石柱。雪深無處認沙堤。常參班裏人猶少。待漏房前月欲西。鳳閣星郎離去遠。閣門開處入還齊。

書懷寄元郎中

轉覺人間無氣味。常因身外省因緣。經過獨愛遊山客。計校唯求買藥錢。重作學官閑盡日。一離江塢病多年。吟君釣客詞中語。便欲南歸榜小船。

贈僧道一作贈道士宣師

自到王城得幾年。巴童蜀馬共隨緣。兩朝侍從當時貴。五字聲名遠處傳。因住紅樓通內院。新承墨詔賜

齋錢。閑房暫喜居相近。還得陪師坐竹邊。

書懷寄王祕書

白髮如今欲滿頭。從來百事盡應休。祗於觸目須防病。不擬將心更養愁。下藥遠求新熟酒。看山多上最高樓。賴君同在京城住。每到花前免獨遊。

題韋郎中新亭

起得幽亭景最新。碧莎地上更無塵。琴書着盡猶嫌少。松竹栽多亦稱貧。藥酒欲開期好客。朝衣暫脫見閑身。成名同日官連署。此處經過有幾人。

送揚州判官

應得煙霞出俗心。茆山道士共追尋。閑憐鶴貌偏能畫。暗辨桐聲自作琴。長嘯每來松下坐。新詩堪向雪中吟。征南幕裏多賓客。君獨相知最校深。

喜王起侍郎放牒

東風節氣近清明。車馬爭來滿禁城。二十八人初上牒。百千萬里盡傳名。誰家不借花園看。在處多將酒器行。共賀春司能鑒識。今年定合有公卿。

贈王司馬

白笏朱衫年少時。久登班列會朝儀。財不省關身用。行義唯愁被衆知。藏得寶刀求主帶。調成駿馬乞人騎。未曾相識多聞說。遙望長如玉樹枝。

書懷

自小習成疎懶性。人間事事總無功。別從仙客求方法。時到僧家問苦空。老大登朝如夢裏。貧窮作活似村中。未能即便休官去。慚愧南山採藥翁。

贈令狐博士

頭白新年六十餘。近聞生計轉空虛。久爲博士誰人識。自到長安賃舍居。騎馬出隨遊寺客。呼兒散寫乞錢書。古來賢哲皆如此。應是才高與衆疎。

送從弟刪東歸

雲水東南兩月程。貪歸慶節馬蹄輕。春橋欲醉攀花別。野路閑吟觸雨行。詩價已高猶失意。禮司曾賞會成名。舊山風月知應好。莫過秋時不到京。

贈王祕書

早在山東聲價遠。曾將奇策佐嫖姚。賦來詩句無閑語。老去官班未在朝。身屈祗聞詞客說。家貧多見野僧招。獨從書閣歸時晚。春水渠邊看柳條。

哭丘長史

曾見先皇殿上臣。丹砂久服不成真。常騎馬在嘶空櫪。自作書留別故人。詩句徧傳天下口。朝衣偏送地中身。最悲昨日同遊處。看卻春風樹樹新。

一作東風處春

送枝江劉明府

老着青衫爲楚宰。平生志業有誰知。家僮從去愁行遠。縣吏迎來恠到遲。定訪玉泉幽院宿。應過碧澗早茶時。向南漸漸雲山好。一路唯聞唱竹枝。

送從弟徹東歸

緱山領印知公奏。才稱同時盡不如。奉使賀成登冊禮。陪班看出降恩書。回程去在秋塵裏。受詔辭歸曉漏初。早晚得爲朝署拜。閑坊買宅作隣居。

哭胡十八遇

早得聲名年尙少。尋常志氣出風塵。文場繼續成三代。家族輝華在一身。幼子見生才滿月。選書知寫未呈人。送君帳下衣裳白。數尺墳頭柏樹新。

贈賈島

離落荒涼僮僕飢。樂遊原上住多時。塞驢放飽騎將出。秋卷裝成寄與誰。拄杖傍田尋野菜。封書乞米趁時炊。姓名未上登科記。身屈惟應內史知。

逢王建有贈

年狀皆齊初有髭。鵲山漳水每追隨。使君座下朝聽易。處士庭中夜會詩。新作句成相借問。閑求義盡共尋思。經今三十餘年事。卻說還同昨日時。

移居靜安坊答元八郎中

長安寺裏多時住。雖守卑官不厭貧。作活每常嫌費力。移居祗是貴容身。初開井淺偏宜樹。漸覺街閑省

踏塵更喜往還相。去近門前減卻送書人。

送楊少尹赴鳳翔

詩名往日動長安。首首人家卷裏看。西學已行秦博士。南宮新拜漢郎官。得錢祇了還書鋪。借宅常時事藥欄。今去岐州生計薄。移居偏近隴頭寒。

送韓侍御歸山

聞君久臥在雲間。爲佐嫖姚未得還。新結茆廬招隱逸。獨騎驄馬入深山。九靈洞口行應到。五粒松枝醉亦攀。明日河聲出城去。家僮不復掃柴關。

新除水曹郎答白舍人見賀

年過五十到南宮。章句無名荷至公。黃紙開呈相府後。朱衣引入謝班中。諸曹縱許爲仙侶。羣吏多嫌是老翁。最幸紫薇郎見愛。獨稱官與古人同。

送楊少尹赴蒲城

官爲本府當身榮。因得還鄉任野情。自廢田園今作主。每逢耆老不呼名。舊遊寺裏僧應識。新別橋邊樹已成。公事況閑詩更好。將隨相逐上山行。

哭元九少府

平生志業獨相知。早結雲山老去期。初作學官常共宿。晚登朝列暫同時。閑來各數經過地。醉後齊吟唱和詩。今日春風花滿宅。入門行哭見靈帷。

送侯判官赴廣州從軍

年少才高求自展。將身萬里赴軍門。辟書遠到開呈客。公服新成着謝恩。驛舫過江分白候。戍亭當嶺見紅旛。海花蠻草連冬有。行處無家不滿園。

答白杭州郡樓登望畫圖見寄

畫得江城登望處。寄來今日到長安。乍驚物色從詩出。更想工人下手難。將展書堂偏覺好。每來朝客盡求看。見君向此閑吟意。肯恨當時作外官。

贈趙將軍

當年膽略已縱橫。每見妖星氣不平。身貴早登龍尾道。功高自破鹿頭城。尋常得對論邊事。委曲承恩掌內兵。會取安西將報國。凌烟閣上大書名。

送和蕃公主

塞上如今無戰塵。漢家公主出和親。色司猶屬宗卿寺。冊號還同虜帳人。九姓旗旛先引路。一生衣服盡隨身。氍毹城南望無迴日。空見沙蓬水柳春。

寒食內宴二首

朝光瑞氣滿宮樓。綵纛魚龍四面稠。廊下御廚分冷食。殿前香騎逐飛毬。千官盡醉猶教坐。百戲皆呈未放休。共喜拜恩侵夜出。金吾不敢問行由。

城闕沈沈向曉寒。恩當令節賜餘歡。瑞煙深處開三殿。香雨微時引百官。寶樹樓前分繡幙。綵花廊下映

華欄宮筵戲樂年年別。已得三迴對御看。

朝日勅賜櫻桃

仙果人間都未有。今朝忽見下天門。捧盤小吏初宣勅。當殿羣臣共拜恩。日色遙分廊下座。露香才出禁中園。每年重此長先熟。願得千春奉至尊。

太白老人

日觀東峯幽客住。竹巾藤帶亦逢迎。暗修黃籙無人見。深種胡麻共犬行。洞裏仙家常獨往。壺中靈藥自爲名。春泉四面遶茅屋。日日唯聞杵臼聲。

和裴司空酬漢城楊少尹

聖朝偏重大司空。人詠元和第一功。擁節高臨襄水上。題詩遠入漢城中。共驚向老多年別。更憶登科舊日同。誰不望歸丞相府。江邊楊柳又秋風。

寄和州劉使君

別離已久猶爲郡。閑向春風倒酒餅。送客將過沙口堰。看花多上水心亭。曉來江氣連城白。雨後山光滿郭青。到此詩情應更遠。醉中高詠有誰聽。

贈商州王使君

銜命南來會郡堂。卻思朝裏接班行。才雄猶是山城守。道薄初爲水部郎。選勝相留開客館。尋幽更引到僧房。明朝從此辭君去。獨出商關路漸長。

寄令狐賓客

勳名盡得國家傳，退押琴僧與酒仙。
暫辭台座已三年，留司未到龍樓下。
拜表長懷玉案前，秋日出城伊水好。
領誰相逐上閑船。

寄梅處士

擾擾人間是與非，官閑自覺省心機。
六行班裏身常下，九列符中事亦稀。
市客慣曾賒賤藥，家童驚見着新衣。
君今獨得居山樂，應笑多時未辦歸。

送施肩吾東歸

知君本是烟霞客，被薦因來城闕間。
世業偏臨七里瀨，仙遊多在四明山。
早聞詩句傳人徧，新得科名到處閑。
惆悵灞亭相送去，雲中琪樹不同攀。

崑崙兒

崑崙家住海中州，蠻客將來漢地遊。
言語解教秦吉了，波濤初過鬱林洲。
金環夜落曾穿耳，螺髻長拳不裹頭。
自愛肌膚黑如漆，行時半脫木綿裘。

贈李杭州

仙郎白首未歸朝，應爲蒼生領六條。
惠化州人盡清淨，高情野鶴共逍遙。
竹間虛館無朝訟，山畔青田長夏苗。
終日政聲長獨坐，開門唯望浙江潮。

送鄭尚書赴廣州

聖朝選將持符節，內制宣時百辟聽。海北蠻夷來舞蹈，嶺南封管送圖經。白鵬飛達迎官舫，紅槿開當譙客亭。此處莫言多瘴癘，天邊看取老人星。

賀祕書王丞南郊攝將軍

正月初天子親郊禮，詔攝將軍領衛兵。斜帶銀刀入黃道，先隨玉輅到青城。壇邊不在千官位，仗外唯聞再拜聲。共喜與君逢此日，病中無計得隨行。

送令狐尚書赴東都留守

朝廷重寄在關東，共說從來選上公。勳業新成大梁鎮，恩榮更守洛陽宮。行香暫出天橋上，引禮常過禁殿中。每領羣臣拜章慶，半開門仗日瞳瞳。

拜豐陵順宗

歲朝園寢遣公卿，學省班中亦攝行。身逐陵官齊再拜，手持木鐸叩三聲。寒更報點來山殿，曉炬分行照栢城。卻下龍門看漸遠，金峯高處日微明。

贈孔尚書

能將直道歷榮班，事著元和實錄間。三表自陳辭北闕，一家相送入南山。買來侍女教人嫁，賜得朝衣在篋閑。宅近青山高靜處，時歸林下暫開關。

酬杭州白使君兼寄浙東元大夫

相印暫離臨遠鎮，掖垣出守復同時。一行已作三年別，兩處空傳七字詩。越地江山應共見，秦天風月不

相知人間聚散真難料。莫歎平生信所之。

寄蘇州白二十三使君

三朝出入紫微臣。頭白金章未在身。登第早年同座主。題詩今日異州人。閨門柳色煙中遠。茂苑鶯聲雨後新。此處吟詩向山寺。知君忘卻曲江春。

送白賓客分司東都

赫赫聲名三十春。高情人獨出埃塵。病辭省闕歸閑處。恩許宮曹作上賓。詩裏難同相得伴。酒邊多見自由身。老人也擬休官去。便是君家池上人。

贈閻少保

辭榮戀闕未還鄉。修養年多氣力強。半俸歸燒伏火藥。全家解說養生方。特承恩詔新開戟。每見公卿不下牀。竹樹清深寒院靜。長懸石磬在虛廊。

贈別王侍御赴任陝州司馬

京城在處閑人少。唯共君行並馬蹄。更和詩篇名最出。時傾盃酒興常齊。同趨闕下聽鐘漏。獨向軍前聞鼓聲。今日春明門外別。更無因得到街西。

田司空入朝

西來將相位兼雄。不與諸君覲禮同。早變山東知順命。新收濟上立殊功。朝官敍謁趨門外。恩使宣迎滿路中。閭闔曉來銅漏靜。身當受冊大明宮。

送浙西周判官

由來自是煙霞客，早已聞名詩酒間。天闕因將賀表到，家鄉新著賜衣還。常吟卷裏相酬句，自話湖邊舊住山。吳越主人偏愛重，多應不肯放君閑。

并送吳鍊師歸王屋

王陽峯下學長生，洞府仙鄉已有名。獨戴熊羆冠暫出，唯將鶴尾扇同行。煉成雲母休炊爨，召得雷公當吏兵。卻到瑤壇上頭宿，應聞空裏步虛聲。

送韶州林使君

詞客南行寵命新，瀟湘郡入曲江津。山幽自足探微處，俗朴應無爭競人。郭外相連排殿閣，市中多半用金銀。知君不作家私計，遷日還同到日貧。

寄王六侍御

漸覺近來筋力少，難堪今日在風塵。誰能借問功名事，祇自扶持老病身。積得藥資將助道，肯嫌家計不如人。洞庭已置新居宅，歸去期君與作鄰。

送稽亭山寺僧

師住稽亭高處寺，斜廊曲閣倚雲開。山門十里松間入，泉澗三重洞裏來。名岳尋遊今已徧，家城禮謁便應迴。舊房到日閑吟後，林下還登說法臺。

送汀州元使君

曾成趙北歸朝計。因拜王門最好官。爲郡暫辭雙鳳闕。全家遠過九龍灘。山鄉祇有輸蕉戶。水鎮應多差鴨欄。地僻尋常來客少。刺桐花發共誰看。

寄孫洛陽格

久持刑憲聲名遠。好是中朝正直臣。上來應足事青衫。老去未離身。常思從省連歸馬。乍覺同班少舊人。遙愛南橋秋日晚。雨邊楊柳映天津。

胡山人歸王屋因有贈

轉轉無成到白頭。人間舉眼盡堪愁。此生已是蹉跎去。每事終從鹵莽休。雖作閑官少拘束。難逢勝景可淹留。君歸與訪移家處。若箇峯前最較幽。

寄處州韓使君

南康太守負才豪。五十如今未擁旄。早得一人知姓字。常聞三事說功勞。月明渡口漳江靜。雲散城頭嶺石高。郡政已成秋思遠。閑吟應不問官曹。

送從弟濛赴饒州

京城南去鄱陽遠。風月悠悠別思勞。三領郡符新寄重。再登科第舊名高。去程江上多看嶺。迎吏船中亦帶刀。到日更行清靜化。春天應不見蓬蒿。

羅道士

城裏無人得實年。衣襟常帶鼻黃煙。樓中賒酒唯留藥。洞裏爭棋不賭錢。聞客語聲知貴賤。持花歌詠似

狂顛尋常行處頻逢見。世上多疑是謫仙。

寄陸渾趙明府

與君學省同官處。常日相隨說道情。新作陸渾山縣長。早知三禮甲科名。郭中時有仙人住。城內應多藥草生。公事稀疎來客少。無妨着屐獨閑行。

同蔣韋二少監贈李郎中

舊年同是此曹郎。各罷魚符自楚鄉。重着青衫承詔命。齊趨紫殿異班行。別來同說經過事。老去相傳補養方。憶得當時亦連步。如今獨在讀書堂。

贈王侍御

心同野鶴與塵遠。詩似冰壺見底清。府縣同趨昨日事。升沉不改故人情。上陽春晚蕭蕭雨。洛水寒來夜夜聲。自歎獨爲折腰吏。可憐驄馬路傍行。

送金少卿副使歸新羅

雲島茫茫天半微。向東萬里一帆飛。久爲侍子承恩重。今佐使臣銜命歸。過海便應將國信。到鄉猶自着朝衣。從前此去人無數。光彩如君定是希。

送李司空赴鎮襄陽

中外兼權社稷臣。千官齊出拜行塵。再調公鼎勳庸盛。三受兵符寵命新。南路雪明旗旆遠。楚堤梅發驛亭春。襄陽風景由來好。重與江山作主人。

送李僕射赴鎮鳳翔

由來勳業屬英雄。兄弟連榮列位同。先入賊城擒首惡。盡封官庫讓元公。旌幢獨繼家聲外。竹帛新添國史中。天子欲收秦隴地。故教移鎮在扶風。

寄白二十二舍人

早知內詔過先輩。踏蹬江南百事疎。湓浦城中爲上佐。廬峯寺後着幽居。偏依仙法多求藥。長共僧遊不讀書。三省比來名望重。肯容君去樂樵漁。

唐張司業詩集卷五

五言絕句

和韋開州居山十二首

宿雲亭

清淨當深處。虛明向遠開。卷簾無俗客。應只見雲來。

梅溪

自愛新梅好。行尋一徑斜。不教人掃石。恐損落來花。

茶嶺

紫芽連白蘂。初向嶺頭生。自看家人摘。尋常觸露行。

流杯渠

淥酒白螺杯。隨流去復回。似知人把處。各向面前來。

盤石磴

墨石連空遠。層層勢更危。不知行幾匝。得到上頭時。

桃塢

春塢桃花發。多將野客遊。日西殊未散。看望酒缸頭。

竹巖

獨入千竿裏。緣巖踏石層。笋頭齊欲出。更不許人登。
琵琶臺

臺上綠羅春。閑登不待人。每當休暇日。着屐戴綸巾。

胡蘆沼

曲沼春流滿。新蒲映野鵝。閒齋朝飯後。拄杖遠行多。

隱月岫

月出深峯裏。清光夏亦寒。每嫌西落疾。不得到明看。

繡衣石楊

山城無別味。藥菜兼魚果。時引繡衣人。同來石上坐。

上士泉餅

堦上一眼泉。四邊青石甃。唯有護淨僧。添餅將鹽漱。

送遠客

憔悴遠行客。殷勤欲別杯。九星壇下路。幾日見重來。

寄西峯僧

松暗水涓涓。夜涼人未眠。西峯月猶在。遙憶草堂前。

禪師

獨在西峯頂。年年閉石房。定中無弟子。人到爲焚香。
惜花

山中春已晚。處處見花稀。明日來應盡。林間宿不歸。

題暉師影堂

日早欲參禪。竟無相識緣。道場今獨到。惆悵影堂前。

涇州塞

行道涇州塞。唯聞羌戍聲。道邊古雙墩。猶記向安西。

野田

漠漠野田草。草中牛羊道。古墓無子孫。白楊不得老。

岸花

可憐岸邊樹。紅蕊發青條。東風吹渡水。衝着木蘭橈。

唐張司業詩集卷六

七言絕句

送蜀客

蜀客南行祭碧雞。木綿花發錦江西。山橋日晚行人少。時見猩猩樹上啼。

送元結

昔日同遊漳水邊。如今重說恨綿綿。天涯相見還離別。客路秋風又幾年。

宮山祠

秋草宮人斜裏墓。宮人誰送葬來時。千千萬萬皆如此。家在邊城亦不知。

美人宮棋

紅燭臺前出翠娥。海沙鋪局巧相和。趁行移手巡收盡。數數看誰得最多。

蠻州

瘴水蠻中入洞流。人家多住竹棚頭。一山海土無城郭。唯見松牌記象州。

送元宗簡

貂帽垂肩窄皂裘。雪深騎馬向西州。暫時相見還相送。卻閉閑門依舊愁。

寄徐晦

鄠陂魚美酒偏濃。不出琴齋見雪峰。應勝昨來趨府日。薄書林上亂重重。

寄白學士

自掌天書見客稀。縱因休沐鎖雙扉。幾迴扶病欲相訪。知向禁中歸未歸。

喜王六同宿

十八年來恨別離。唯同一宿詠新詩。更相借問詩中語。共說如今勝舊時。

題玉像堂

玉毫不着世間塵。輝相分明十八身。入夜無煙燈更好。堂中唯有轉經人。

與賈島閑遊

水北原南草色新。雪消風暖不生塵。城中車馬應無數。解得閑行有幾人。

哭丘長史

丘公已歿故人稀。欲過街西更訪誰。每到子城東路上。憶君相逐入朝時。

哭孟寂一作哭孟郊

曲江院裏題名處。十九人中最少年。今日春光吟不見。杏花零落寺門前。

患眼

三年患眼今年校。免與風光便隔生。昨日韓家後園裏。看花猶似未分明。

答劉競

劉君久被時拋擲。老向城中作選人。昨日街西相近住。每來存問老夫身。
贈華嚴院僧

一身依止荒閑院。燭耀窗中有宿煙。徧禮華嚴經裏字。不曾行到寺門前。
逢故人

山東一十餘年別。今日相逢在上都。說盡向來無限事。相看盡是白髭鬚。
送蕭遠弟

街北槐花傍馬垂。病身相送出門遲。與君別後秋風夜。作得新詩說向誰。
送辛少府任安縣

才多不肯浪容身。老大詩章轉更新。選得天台山下住。一家全作學仙人。
贈任道人

長安多病無生計。藥鋪醫人亂索錢。欲得定知身上事。憑君爲筭小行年。
招周居士

閉門秋雨溼牆莎。俗客來稀野思多。已掃書齋安藥竈。山人作意早經過。
送許處士

高情自與俗人疎。獨向藍谿僻處居。會到白雲長取醉。不能窗下讀閑書。
送律師歸婺州

京中開講已多時。曾作壇頭證戒師。歸到雙溪橋北寺。鄉僧爭就學。或儀題楊秘書新居。

愛閑不向爭名地。宅在街西最靜坊。卷裏詩過一千首。白頭新受秘書郎。

送匪師

九星臺下煎茶別。五老峰頭覓寺居。作得新詩旋相寄。人來請莫達空書。

送僧往全州

開道谿陰山水好。師行一一徧經過。事須覓取堪居處。若箇谿頭藥最多。

尋徐道士

尋師遠到暉天觀。竹院森森閉藥房。聞入靜來經七日。仙童簷下獨焚香。

答開州韋使君寄車前子

開州午日車前子。作藥人皆道有神。慙愧使君憐病眼。二千里外寄閑人。

憶故州

累石爲山伴野夫。自收靈藥讀仙書。如今身是他州客。每見青山憶舊居。

送客遊蜀

行盡青山到益州。錦城樓下三江流。杜家曾向此中住。爲到浣花谿水頭。

送陸暢

共踏長安街裏塵。吳州獨作未歸身。昔年舊宅今誰住。君過西塘與問人。

感春

遠客悠悠任病身。謝家池上又逢春。明年各自東西去。此地看花是別人。

贈李司議

漢庭誰問投荒客。十載天南着白衣。秋草茫茫惡谿路。嶺頭還送北人歸。

別客

青山歷歷水悠悠。今日相逢明日秋。繫馬城邊楊柳樹。爲君沽酒暫淹留。

登樓寄胡家兄弟

獨上西樓盡日閑。林煙演漾鳥綿蠻。謝家兄弟重城裏。不得同看雨後山。

答劉明府

身病多時又客居。滿城親舊久相疎。可憐絳縣劉明府。獨解頻頻寄遠書。

酬藤杖

病裏出門行步遲。喜君相贈古藤枝。倚來自覺身生力。每向傍人說得時。

法雄寺東樓

汾陽舊宅今爲寺。猶有當時歌舞樓。四十年來車馬絕。古槐深巷暮蟬愁。

寄故人

靜曲閑房病客居。蟬聲滿樹槿花疎。故人祇在藍田縣。強半年來未得書。
鄰婦哭征夫

雙鬟初合便分離。萬里征夫不得隨。今日軍回身獨歿。去時鞍馬別人騎。
和崔駙馬聞蟬

鳳凰樓下多歡樂。不覺秋風暮雨天。應爲昨來身暫病。蟬聲得到耳傍邊。
和裴僕射看櫻桃花

昨日南園新雨後。櫻桃花發舊枝柯。天明不待人同看。遶樹重重履跡多。
和長安郭明府與友人縣中會飲

一罇清酒兩人同。好在街西水縣中。自恨病身相去遠。此時閑坐對秋風。
唐昌觀看花一作興唐

新紅舊紫不相宜。看覺從前兩月遲。更向同來詩客道。明年到此莫過時。
九華觀看花

街西無數閑遊處。不似九華仙觀中。花裏可憐池上景。幾重牆壁貯春風。
贈姚合

丹鳳城門向曉開。千官相次入朝來。唯君獨走衝塵土。下馬橋邊報直迴。
同韋員外開元觀尋時道士

觀裏初晴竹樹涼。閑行共到最高房。昨來官罷無生計。欲就師求斷穀方。

同韓侍御南谿夜賞

喜作閑人得出城。南谿兩月逐君行。忽聞新命須歸去。一夜船中語到明。

使行望悟眞寺

採玉峰連佛寺幽。高高斜對驛門樓。無端來去騎官馬。寸步教身不得遊。

重陽日至峽道

無限青山行已盡。迴看忽覺遠離家。逢高欲飲重陽酒。山菊今朝未有花。

贈主客劉郎中

憶昔君登南省日。老夫猶是褐衣身。誰知二十餘年後。來作客曹相替人。

同嚴給事聞唐昌觀玉藥近有仙過作二首

千枝花裏玉塵飛。阿母宮中見亦稀。應共諸仙鬪百草。獨來偷折一枝歸。

九色雲中紫鳳車。尋仙來到洞仙家。飛輪迴處無踪跡。唯有斑斑滿地花。

秋思

洛陽城裏見秋風。欲作歸書意萬重。復恐匆匆說不盡。行人臨發又開封。

憶遠

行人猶未有歸期。萬里初程日暮時。唯愛門前雙柳樹。枝枝葉葉不相離。

玉仙館

長谿新雨色如泥。野水陰雲盡向西。楚客天南行漸遠。山山樹裏鷓鴣啼。

寄府吏

野外尋花共作期。今朝出郭不相隨。待君公事有閑日。此地春光應過時。

張蕭遠雪夜同宿

數卷新遊蜀地詩。長安僻巷得相隨。草堂雪夜攜琴宿。說似青城館裏時。

涼州詞三首

邊城暮雨鴈飛低。蘆笋初生漸欲齊。無數鈴聲遙過磧。應馱白練到安西。
鳳林關裏水東流。白草黃榆六十秋。邊將皆承主恩澤。無人解道取涼州。
古鎮城門白磧開。胡兵往往傍沙堆。巡邊使客行應早。欲問平安無使來。

宮詞二首

新應初放免猶肥。白日君王在內稀。薄暮千門臨欲鎖。紅粧飛騎向前歸。

華清宮

溫泉流入漢離宮。宮樹行行浴殿空。武帝時人今欲盡。青山空閉御牆中。

崔駙馬養鶴

身閑無事稱高情。已有人間章句名。求得鶴來教翦翅。望仙臺下亦將行。

閑遊

老身不計人間事。野寺秋晴每獨過。病眼校來猶斷酒。卻嫌行處菊花多。

劉兵曹贈酒

一餅顏色似秋泉。開向新栽小竹前。飲罷身中更無事。移床獨就夕陽眠。

送梧州王使君

楚江亭上秋風起。看發蒼梧太守船。千里同行從此別。相逢又隔幾多年。

春日早朝

曉陌春寒朝騎來。瑞雲深處見樓臺。夜來新雨沙堤溼。東上開門應未開。

寄朱闕二山人

爲箇朝章束此身。眼看東路去無因。歷陽舊客今應少。轉憶鄰家二老人。

寄李渤

五度谿頭躑躅紅。嵩陽寺裏講時鍾。春山處處行應好。一月看花到幾峰。

尋仙

谿頭一徑入青崖。處處仙居隔杏花。更見峰西幽客說。雲中猶有兩三家。

同白侍郎杏園贈劉郎中

一去瀟湘頭已白。今朝始見杏花春。從來遷客應無數。重到花前有幾人。

答鄱陽客藥名詩

江臯歲暮相逢地。黃葉霜前半夏枝。子夜吟詩向松桂。心中萬事喜君知。

寄宋景

詔發官兵取亂臣。將軍弓箭不離身。君今獨在征東府。莫遣功名屬別人。

寄王奉御

愛君紫閣峰前好。新作書堂藥竈成。見欲移居相近住。有田多與種黃精。

題渭北寺上人

昔祭郊壇今謁陵。寺中高處復來登。十餘年後人多別。喜見當時轉讀僧。

閑遊

終日不離塵土間。若爲能見此身閑。今朝暫共遊僧語。更恨多時別舊山。

倡女詞

輕鬟叢梳闊掃眉。爲嫌風日下樓稀。畫羅金縷難相稱。故着尋常淡薄衣。

答元八遣紗帽

黑紗方帽君邊得。稱對山前坐竹牀。唯恐被人偷樣剪。不曾閑戴出書堂。

題僧院

聞師行講青龍院。本寺往來多少年。靜掃空房唯獨坐。千莖秋竹在簷前。

送元八

百神齋祭相隨徧。尋水看山亦共行。明日城西送君去。舊遊重到獨題名。

吳楚歌詞

庭前春鳥啄林聲。紅夾羅襦縫未成。今朝社日停針線。起向朱櫻樹下行。

題方睦上人月臺觀

一身清淨無童子。獨坐空堂得幾年。每夜焚香通月觀。可憐光影最團圓。

華山廟

金天廟下西京道。巫女紛紛走似煙。手把紙錢迎過客。遣求恩福到神前。

病中酬元宗簡

東風漸暖滿城春。獨向深房養病身。莫說櫻桃花已發。今年不作看花人。

寺宿齋

晚到金光門外寺。寺中新竹隔簾多。齋宮禁與僧相見。院院開門不得過。

贈施肩吾

世間漸覺無多事。雖得空名未着身。合取藥成相待喫。不須先作上天人。

贈王建

自君去後交遊少。東野亡來篋笥貧。賴有白頭王建在。眼前猶見詠詩人。

逢賈島

僧房逢着款冬花。出寺行吟日已斜。十二街中春雪遍。馬蹄今去入誰家。

楚妃怨

梧桐葉下黃金井。橫架轆轤牽素綆。美人初起天未明。手拂銀瓶秋水冷。

離宮怨

高堂別館連湘渚。長向春光開萬戶。荆王去去不復來。宮中美人自歌舞。

成都曲

錦江近西烟水綠。新雨山頭荔枝熟。萬里橋邊多酒家。遊人愛向誰家宿。

寒塘曲

寒塘沉沉柳葉疎。水暗人語驚棲鳧。舟中少年醉不起。持燭照水射遊魚。

春別曲

長江春水綠堪染。蓮葉出水大如錢。江頭橋樹君自種。那長繫木蘭船。

臺城

臺城六代競豪華。結綺臨春事最奢。萬戶千門成野草。只緣一曲後庭花。

春詞

新粧回面下朱樓。深鎖春光一院愁。行到中庭數花朵。蜻蜓飛上玉搔頭。

浪淘沙詞

鸚鵡洲頭浪颭沙。青樓春望日將斜。銜泥燕子爭歸舍。獨自狂夫不憶家。

傷愚溪二首

柳門竹巷依依在。野草青苔日日多。縱有鄰人解吹笛。山陽舊侶更誰過。溪水悠悠春自來。草堂無主燕飛回。隔簾唯見中庭草。一樹山榴依舊開。

聽舊宮人穆氏唱歌

曾隨織女渡天河。記得雲間第一歌。休唱貞元供奉曲。當時朝士已無多。

楊柳枝詞二首

楊帝行宮汴水濱。數株殘柳不勝春。晚來風起花如雪。飛入宮牆不見人。城外春風吹酒旗。行人揮袂日西時。長安陌上無窮樹。唯有垂楊管別離。

宿都庭有懷

雷雨湘江起臥龍。武陵樵客躡仙蹤。十年楚水楓林下。今夜初聞長樂鍾。

無題

桃蹊柳陌好經過。燈下粧成月下歌。爲是襄王故宮地。至今猶有細腰多。

堤上行二首

酒旗相望大堤頭。堤下連橋堤上樓。日暮行人爭渡急。槳聲幽軋滿中流。

江南江北望烟波。入夜行人相應歌。桃葉傳情竹枝怨。水流無限月明多。

竹枝詞五首

白帝城頭春草生。白鹽山下蜀江清。南人上來歌一曲。北上莫上動鄉情。
日出三竿春霧銷。江頭蜀客駐蘭橈。憑寄狂夫書一紙。家住成都萬里橋。
瞿唐嘈嘈十二灘。此中道路古來難。長恨人心不如水。等閒平地起波瀾。
山上層層桃李花。雲間烟火是人家。銀釧金釵來負水。長刀短笠去留賒。
楊柳青青江水平。聞郎江上唱歌聲。東邊日出西邊雨。道是無情還有情。

楊柳送客

青楓江畔白蘋洲。楚客傷離不待秋。君見隋朝更何事。綠楊南渡水悠悠。

送客還幽州

惆悵秦城送獨歸。薊門雲樹遠依依。秋來莫射南飛鴈。從遣乘春更北飛。

揚州送客

南行直入鷓鴣羣。萬歲橋邊一送君。聞道望鄉聽不得。梅花暗落嶺頭雲。

隋宮燕

燕語如傷舊國春。宮花零落旋成塵。自從門閉春光後。幾度飛來不見人。

山禽

山禽毛如白練帶。栖我庭前栗樹枝。獼猴半夜來取栗。一雙中林向月飛。

秋山

秋山無雲復無風。溪頭看月出深松。草堂不閉石床靜。葉間墜露聲重重。

玉真觀

臺殿曾爲貴主家。春風吹盡竹窗紗。院中仙女修香火。不許閑人入看花。

蠻中

銅柱南邊毒草春。行人幾日到金麟。玉鑲穿耳誰家女。自抱琵琶迎海神。

贈道士

茆山近別剡谿逢。玉節青旄十二重。自說年年上天去。羅浮最近海邊峰。

重平驛作

茫茫菰草平如地。渺渺長堤曲似城。日暮未知投宿處。逢人更問向前程。

宿天竺寺寄靈隱寺僧

夜向靈谿息此身。風泉竹露淨衣塵。月明石上堪同宿。那作山南山北人。

唐張司業詩集卷七拾遺

樂府三十三首

隴頭行

隴頭路斷人不行。胡騎已入涼州城。漢兵處處格鬪死。一朝盡沒隴西地。驅我邊人胡中去。恣放牛羊食禾黍。去年中國養子孫。今着氈裘學胡語。誰能還使李輕車。重取涼州屬漢家。

廢宅行

胡馬崩騰滿阡陌。都人避亂唯空宅。宅邊青桑垂宛宛。野蠶食葉還成繭。黃雀銜草入燕窠。嘖嘖啾啾白日晚。去時禾黍埋地中。饑兵掘土翻重重。鷗臬養子庭樹上。曲牆空屋屋一作室多旋風。亂定幾人還本土。唯有官家重作主。

秋夜長

秋天如水夜未央。天漢東西月色光。愁人不寐畏枕席。暗蟲嘖嘖遠我傍。荒城爲村無更聲。起看北斗天未明。白露滿田風裊裊。千聲萬聲鷓鴣鳴。

塞上曲

遼州八月修城堡。候騎先燒磧上草。胡風吹沙度隴飛。隴頭林木無北枝。將軍閱兵青塞下。鳴鼓鼙鼓促獵圍。天寒山路石斷裂。白日不銷帳上雪。烏孫國亂多降胡。詔使名王持漢節。年年征戰不得閒。邊人殺

盡唯空山。

董逃行

洛陽城頭火燿燿。亂兵燒我天子宮。宮城南面有深山。盡將老幼藏其間。重巖爲屋椽爲食。丁男夜行候消息。聞道官軍猶掠人。舊里如今歸未得。董逃行。漢家幾時重太平。

江村行

南塘水深蘆笋齊。下田種稻不作畦。耕場磷磷在水底。短衣半染蘆中泥。田頭刈莎結爲屋。歸來繫牛還獨宿。水淹手足盡爲瘡。山虵遶衣飛撲撲。桑村樵黑蠹再眠。小姑採桑不餉田。江南熱旱天氣毒。雨中移秧顏色鮮。一年耕種長苦辛。田熟家家將賽神。

湘江曲

湘江無潮秋水闊。湘中月落行人發。行人發。送人歸。白蘋茫茫鷗鵠飛。

白鼉吟

天欲雨。有東風。南溪白鼉鳴窟中。六月人家井無水。夜聞鼉聲人盡起。

樵客吟

山上探樵選枯樹。深處樵多出辛苦。秋來野火燒樵枝。林柯已枯堪採取。斧聲坎坎在幽谷。探得齊梢青葛束。日西待伴同下山。竹擔彎彎向身曲。其知路傍多虎穴。未出深林不敢歇。村西地暗狐兔行。稚子叫時相應聲。探樵客。莫探松與栢。松栢生枝直且堅。與君作屋成家宅。

春江曲

春江無冰潮水平。蒲心出水鳧鵲鳴。長干夫婿愛遠行。自染春衣縫已成。妾身生長金陵側。去年夫婿住江北。春來未到父母家。舟小風多渡不得。欲辭舅姑先問人。私向江頭祭鬼神。

烏棲曲

西山作宮花滿池。宮鳥曉鳴葉黃枝。吳姬採蓮自唱曲。君王昨夜船中宿。

短歌行

青天蕩蕩高且虛。上有白日無根株。流光暫出還入地。使我少年不須臾。與君相逢勿寂寞。衰老不復如今樂。金卮盛酒置君前。再拜勸君千萬年。

泗水行

泗水流急石纂纂。鯉魚上下紅尾短。春冰消散日華滿。行舟往來浮橋斷。城邊漁市人早行。水烟漠漠多棹聲。

雲童行

雲童童。白龍之尾垂江中。今年天旱不作雨。水足牆上有禾黍。

長塘湖

長塘湖。一斛水中半斛魚。大魚如柳葉。小魚如針鋒。水濁誰能辯真龍。

雀飛多

雀飛多。觸網羅。網羅高樹顛。汝飛蓬蒿下。勿復投身網羅間。粟積倉。禾在田。巢之鵲。望其母來還。

寄葛蒲

石上生葛蒲。一寸十二節。仙人勸我食。令我頭青面如雪。逢人寄君一絳囊。書中不得傳此方。君能來作樓霞侶。與君同入丹玄鄉。

山頭鹿

山頭鹿。雙角芟芟尾促促。貧兒多租輸不足。夫死未葬兒在獄。旱日熬熬蒸野岡。禾黍不熟無獄糧。縣家惟憂少軍食。誰能令爾無死傷。

憶遠曲

水上山沉沉。征途復繞林。途荒人行少。馬迹猶可尋。雪中獨立樹。海口失侶禽。離憂如長線。千里縈我心。

春堤曲

野塘鵲鵲飛樹頭。綠蒲紫菱蓋碧流。誰家狂客愛雲水。日日獨來城下游。

湖南曲

瀟湘多別離。風起芙蓉洲。江上人已遠。夕陽滿中流。鴛鴦東南飛。飛上青山頭。

春水曲

鴨鴨嘴。啖啖青蒲生。春水狹。蕩漾木蘭船。中有雙少年。少年醉鴨不起。

送遠曲

吳門向西流水長。水長柳暗烟茫茫。行人送客各惆悵。話離敍別傾清觴。吟絲竹。鳴笙簧。酒酣性逸歌猖狂。行人告我挂帆去。此去何時返故鄉。殷勤振衣兩相囑。世事近來還淺促。願君看取吳門山。帶雪經春依舊綠。行人行處求知親。送君去去徒酸辛。

楚妃怨

湘雲初起江沉沉。君王遙在雲夢林。江南雨多旌戟暗。臺下朝朝春水深。章華殿前朝下國。君心獨自終無極。楚兵滿地兼逐禽。誰用一身騁筋力。西江若翻雲夢中。麋鹿死盡應還宮。

春日行

春日融融池上暖。竹芽出土蘭心短。草堂晨起酒半醒。家僮報我後字園花已有字滿。頭上皮冠未曾整。直入花間不尋逕。樹樹殷勤盡繞行。攀枝未遍春日暝。不用積金着青天。不用服藥求神仙。但願園裏花長好。一生飲酒花間老。

廢瑟詞

古瑟在匣誰復識。玉柱顛倒朱絲黑。千年曲譜不分明。樂府無人傳正聲。秋蟲暗穿塵作色。腹中不辯工人名。幾時天下復古樂。此瑟重奏雲門曲。

洛陽行

洛陽宮闕當中州。城上峨峨十二樓。翠華西去幾時返。鳥巢乳鳥藏蟄燕。御門空鎖五十年。稅彼農夫修玉殿。六街朝暮鼓鼙琴。禁兵持戟守空宮。百官日月拜章表。驛使相續長安道。上陽宮樹黃復綠。野豺入

苑食麋鹿。陌上老翁雙淚垂。共說武皇巡幸時。

懷別

僕人驅行軒。低昂出我們。離堂無留客。席上唯琴樽。古道隨水曲。悠悠繞荒村。遠程未奄息。別念在朝昏。端居愁歲永。獨此留輕景。豈無經過人。尋嘆門巷靜。君如天上雨。我如屋下井。無因同波流。願作形與影。

離婦

十載來夫家。閨門無瑕疵。薄命不生子。古制有分離。託身言同穴。今日事乖違。念君終棄捐。誰能強在茲。堂上謝姑嫜。長跪請離辭。姑嫜見我往。將決復沉疑。與我古時劍。留我嫁時衣。高堂拊我身。作一哭我於路陲。昔日初爲婦。當君貧賤時。晝夜常紡績。不得事蛾眉。辛勤積黃金。濟君寒與饑。洛陽買大宅。邯鄲買侍兒。夫壻乘龍馬。出入有光儀。將爲富家婦。永爲子孫資。誰謂出君門。一身上車歸。有子未必榮。無子坐生悲。爲人莫作女。作女實難爲。

新桃

桃生葉婆娑。枝葉四面多。高未出牆顛。蒿莧相凌摩。植之三年餘。今年初試花。秋來未成實。其陰良已嘉。青蟬不來鳴。安得迅羽過。常恐牽絲蟲。蒙幕成網羅。願託戲童兒。勿折吾柔柯。明年結甘實。磊磊充汝家。

惜花

濛濛庭樹花。墜地無顏色。日暮東風起。飄揚玉堦側。殘蕊在猶稀。青條聳復直。爲君結芳實。令君勿嘆息。

古風二十七首

董公詩

湯中謂此篇與學仙樂天所稱謂可下誨藩臣上誦人主

誰主東諸侯。元臣隴西公。旌節居汴水。四方皆承風。在朝四十年。天下誦其功。相我明天子。政成如太宗。東方有艱難。公乃出臨戎。單車入危城。慈惠安羣兇。公謂其黨言。汝材甚驍雄。爲我帳下士。出入衛我躬。汝息爲我子。汝親我爲翁。衆皆相顧泣。無不和且恭。其父教子義。其妻勉夫忠。不自以爲資。奉上但顒顒。公衣無文采。公食少肥濃。所憂在萬人。人實我寧空。輕刑寬其政。薄賦施租庸。四郡三十城。不知歲饑凶。天子臨朝喜。元老置在東。今聞揚盛德。就安我大邦。百辟賀明主。皇風恩賜重。朝廷有大事。就決其所從。海內旣無虞。君臣方肅雍。端居任僚屬。宴語常從容。翩翮者蒼鳥。來巢於林叢。甘瓜生場圃。一蒂實連中。田有嘉穀異。隴畝穗亦同。賢人佐聖人。德與神明通。感應我淳化。生瑞我地中。昔者此州人。但矜馬與弓。今公施德禮。自然威武崇。公與其百年。受祿將無窮。

學仙

樓觀開朱門。樹木連房廊。中有學仙人。少年休穀糧。高冠如芙蓉。霞月披衣裳。六時朝上清。佩玉紛鏘鏘。自言天老書。祕覆雲錦囊。百年度一人。妄泄有災殃。每占有仙相。然後傳此方。先生坐中堂。弟子跪四廂。金刀截身髮。結誓焚靈香。弟子得其訣。清齋入空房。守神保元氣。動息隨天罡。爐燒丹砂盡。晝夜候火光。藥成旣服食。計日乘鸞鳳。虛空無靈應。終歲安所望。勤勞不能成。疑慮積心腸。虛羸生疾病。壽命多天傷。身歿懼人見。夜埋山谷傍。求道慕靈異。不如守尋常。先王知其非。戒之在國章。

沈千運舊居

汝北君子宅。我來見頽墉。亂離子孫盡。地屬隣里翁。土木被丘墟。蹊路不相通。舊井臺草合。牛羊墜其中。君辭天子書。放意任體躬。一生不自力。家與逆旅同。高議切星辰。餘聲激瘖聵。方將旌舊聞。百歲可封崇。嗟其未積年。已爲荒林叢。時豈無知音。音作莫能敦此風。浩蕩竟無覩。我將安所從。

懷友

人生有行役。誰能如草木。別離感中懷。乃爲我桎梏。百年受命短。光景良不足。念我別離者。願懷日月促。平地施道路。車馬往不復。空知爲良田。秋望不黍熟。端居無儔侶。日夜禱耳目。立身難自覺。常恐恐作憂與辱。窮賤無閒暇。疾病多嗜慾。我思攜手人。逍遙任心腹。

寄韓愈

野館非我室。新居未能安。讀書避塵雜。方覺此地閒。過郭多園墟。桑果相接連。獨游竟寂寞。如寄空雲山。夏景常晝毒。密林無鳴蟬。臨溪一盥濯。清去肢體煩。出林望層城。君子在其間。戎府草章記。阻我此游盤。憶昔西潭時。並持釣魚竿。共忻得魴鯉。烹鱸于我前。幾朝還復來。嘆息時獨言。

別段生

與子骨肉親。願其長相隨。況離父母傍。從我學詩書。同在道路中。講誦亦未窺。爲文于我前。日夕生光儀。行役多疾病。賴此相扶持。貧賤事俱難。今日有別離。我去秦城中。子留汴水湄。離情兩飄斷。豈異風中絲。幼年獨爲客。舉動難爲宜。努力自修勵。長如見我時。我時登山岡。再揖問還期。還期在新年。勿怨歡會遲。

贈姚怱

漏天日無光。澤土松不長。君今職下位。志氣安得揚。白髮文思壯。才爲國賢良。無人識高韻。薦于天子傍。況我愚朴姿。強趨利名場。遠同干貴人。身舉固難彰。昔逢汴水濱。今會習池陽。豈無再來期。願恐非此方。願爲石中泉。不爲瓦上霜。離別勿復道。所貴不相忘。

傷于鵠

西山無逸人。忽覺大國貧。良玉沉幽泉。名爲天下珍。野性踈時俗。再命乃從軍。氣高終不合。去如鏡上塵。我初有章句。相合者惟君。今來吊嗣子。對隴燒斯文。耕者廢其耜。蠹者絕其薪。筒無新衣裳。曷用光我身。冀回徒再拜。昔意安能陳。徒保金石韻。千載人所聞。

和李僕射西園

見木鐸集迴司業詩之別名

過午歸閒處。西亭敞四簷。高眠着琴枕。散帙檢書籤。印在休通客。山晴好捲簾。竹涼蠅少到。藤暗蝶爭潛。晚鵲頻驚喜。踈蟬不許拈。石苔生紫點。欄藥吐紅尖。虛坐詩情遠。幽探道事兼。所營當勝地。雖儉復誰嫌。獻從兄

悠悠旱天雲。不遠如飛塵。賢達失其所。沉飄同衆人。擢秀登王畿。出爲良使賓。名高滿朝野。幼賤誰不聞。一朝遇讒邪。流竄八九春。詔書近遷移。組綬未及身。冬井無寒冰。玉潤難爲焚。虛懷日迢遙。榮辱常保純。我念出游時。每吟康樂文。願言靈溪期。聊欲相依因。

南歸

促促念道路。四支不常寧。行車未及家。天外非盡程。骨肉望我歎。鄉里望我榮。豈知東與西。憔悴竟無成。

天寒苦夜長。窮者不念明。懼離其寢寐。百憂傷性靈。世道多險薄。相勸異忠誠。遠游無知音。不如商賈行。達人有常志。愚夫勞無營。舊山幸未賣。言歸樂此生。

臥疾

身病始知道。臥讀神農經。空房夜留燈。四壁青熒熒。羈旅逐人歡。貧賤還自輕。今來問良醫。乃知病所生。僮僕各相憂。杵臼無停聲。見我形憔悴。勸藥語丁寧。春雨枕席冷。窗前新禽鳴。開門起無力。遙愛鷄犬行。服藥察耳目。漸覺如酒醒。方悟養生者。不爲憂患并。

贈孟郊

歷歷天上星。沉沉水中萍。幸當清秋夜。流影及微形。君生衰俗間。立身如禮經。淳意發高文。獨有金石聲。才名振京國。歸省東南行。停車楚城下。顧我不念程。寶鏡曾墮水。不磨難自明。苦節居貧賤。所知賴友生。歡會方別離。戚戚憂慮并。安得在一方。終老無送迎。

城南

漾漾南澗水。來作曲池流。言尋參差島。曉榜輕盈舟。萬繞不再止。千尋盡孤幽。藻澀訝人重。萍分指魚遊。繁苗毯下垂。密箭翻迴軸。曝鼈亂自墜。陰藤斜相鉤。臥蔭黑米吐。翻芰紫角稠。橋低競俯偃。亭近閒夷猶。目爲逐勝朗。手因撥芳柔。漸喜游來極。忽疑歸無由。氣狀雖可覽。纖微諒難搜。未聽主人賞。徒愛清華秋。

夜懷

窮居積遠念。轉轉迷所歸。幽蕙零落色。暗螢參差飛。病生秋風簾。淚墮明月衣。無愁坐寂寞。重使奏清微。

奉和舍人宿直省時思琴

藹藹紫微直。秋意深無窮。滴瀝仙閣漏。肅穆禁池風。竹月泛涼影。蒼霧澹幽叢。地清物態勝。宵閒琴思通。時屬雅音際。迴凝虛抱中。達人掌樞近。常與隱默同。

野寺後池寄友

佛寺連野水。池幽夏景清。繁木蔭芙蕖。時有水禽鳴。通溪岸壑斷。分渚流復縈。伴僧鐘磬罷。月來池上明。友人竟不至。東北見高城。獨游自寂寞。況此恨盈盈。

寄別者

寒天正飛雪。行人心切切。同爲萬里客。中路忽離別。別君汾水東。望君汾水西。積雪無平岡。空山無人蹊。羸馬時倚轅。行行未遑食。下車勸童僕。相顧莫歎息。詎知佳期隔。離念終無極。

病中寄白學士拾遺

秋亭病客眠。庭樹滿枝蟬。涼風繞砌起。斜影入牀前。梨晚漸紅墜。菊寒無黃鮮。倦游寂寞日。感嘆蹉跎年。塵歡久消委。華念獨迎延。自寓城闕下。識君弟事焉。君爲天子識。我方沉病纏。無因會同語。悄悄中懷煎。

雨中寄元宗簡

秋堂羸病起。盪漉風雨朝。竹影冷踈澀。榆葉暗飄蕭。街徑多墜果。牆隅有蛻蜩。延瞻游步阻。獨坐閒思饒。君居應如此。恨言相去遙。

岸花

可憐岸邊樹。紅藥發青條。東風吹渡水。衝着木蘭橈。

惜花

春潭足芳樹。水清不如素。幽人愛華景。一一空山暮。
月出潭氣白。游魚暗衝石。夜深春思多。酒醒山寂寂。

別于鵠

離燈及晨輝。行人起復思。出門兩相顧。青山路逶迤。

野草

羈羈野田草。草中牛羊道。古墓無子孫。白楊不得老。

秋山

秋山無雲復無風。溪頭看月出深松。草堂不閒石床靜。葉間墜露聲重重。

山禽

山禽毛如白練帶。棲我庭前栗樹枝。獼猴夜半來取栗。一雙中林向月飛。

祭退之

嗚呼吏部公。其道誠巍昂。生爲大賢姿。天使光我唐。德義動鬼神。鑒用不可詳。獨得雄直氣。發爲古文章。
學無不該貫。吏治得其方。三次論諍退。其志亦剛彊。再使平山東。不言所謀臧。薦待皆寒羸。但取其才良。
親朋有孤稚。婚姻有辦營。如彼天有斗。人可爲信常。如彼歲有春。物宜得華昌。哀哉未申施。中年遽殂喪。

朝野良共哀。矧於知舊腸。籍在江湖間。獨以道自將。學詩爲衆體。久乃溢笈囊。略無相知人。黯如霧中行。北遊偶逢公。盛語相稱明。名因天下聞。傳者入歌聲。公領試士司。首薦到上京。一來遂登科。不見苦貢場。觀我性朴直。乃言及平生。由慈顙朋黨。骨肉無以當。坐令其子拜。常呼幼時名。追招不隔日。繼踐公之堂。出則連轡馳。寢則對榻床。搜窮古今書。事事相酌量。作酌一量有花必同尋。有月必同望。爲文先見草。釀熟偕共觴。新果及異鮭。無不相待嘗。到今三十年。曾不少異更。公文爲時帥。我亦有微聲。而後之學者。或號爲韓張。我官麟臺中。公爲大司成。念此委末秩。不能力自揚。特狀爲博士。始獲升朝行。未幾享其資。遂忝南宮郎。是事賴拯扶。如屋有棟梁。去夏公請告。養疾城南庄。籍時官休罷。兩月同游翔。黃子陂岸曲。地曠氣色清。新池四平漲。中有蒲荇香。北臺臨稻疇。茂柳多陰涼。板亭坐垂釣。煩苦稍已平。共愛池上佳。聯句舒遐情。偶有賈秀才。來茲亦間并。移船入南溪。東西縱篙根。劃波激船舷。前後飛鷗鷺。回入潭瀨下。網截鯉與魴。踏沙掇水蔬。樹下蒸新杭。日來相與嬉。不知暑日長。柴翁攜童兒。聚觀於岸傍。月中登高灘。星漢交垂芒。釣車擲長綫。有獲齊歡驚。夜闌乘馬歸。衣上草露光。公爲遊谿詩。唱咏多慨慷。自期此可老。結社於其鄉。籍受新官詔。拜恩當入城。公因同歸還。居處隔一坊。中秋十六夜。魄圓天差晴。公旣相邀留。坐語於堵櫓。乃出二侍女。合彈琵琶箏。臨風聽繁絲。忽遽聞再更。顧我數來過。是夜涼難忘。公疾浸日加。孺人視藥湯。來候不得宿。出門每迴遑。自是將重危。車馬候縱橫。門僕皆逆道。獨我到寢房。公有曠達識。生死爲一網。及當臨終晨。意色亦不荒。贈我珍重言。傲然委衾裳。公比欲爲書。遺約有修章。令我署其末。以爲後事程。家人號於前。其書不果成。子符奉其言。甚於親使令。魯論未訖注。手跡今微茫。新亭成未登。閉在莊

西廂書札與詩文。重疊我笥盈。頃息萬事盡。腸情多摧傷。舊塋盟津北。野窆動鼓鉦。柳車一出門。終天無迴箱。籍貧無贈貲。曷用申哀誠。衣器陳下帳。醢餌奠堂皇。明靈庶鑒知。髣髴斯來饗。

野居此一首當補在古風中城南後

貧賤易爲適。荒郊亦安居。端坐無餘思。彌樂古人書。秋田多良苗。野水多遊魚。我無耒與網。安得充廩廚。寒天白日短。簷下煖我軀。四肢暫寬柔。中腸鬱不舒。多病減志氣。爲客足憂虞。況復時節晚。覽物空踟蹰。

唐張司業詩集卷八

一十九首

山中酬人

山中日煖春鳩鳴。逐水看花任意行。向晚歸來石窗下。菖蒲葉上見題名。

岳州晚景

此詩舊選皆云張正言作

晚景寒鴉集。秋聲遠雁歸。水光浮日去。霞彩映江飛。洲白蘆花吐。園紅柿葉稀。長沙卑溼地。九月未成衣。

水已上三首
見本鐸集

蕩漾空沙際。虛明入遠天。秋光照不極。鳥色去無邊。勢引長雲闊。波輕片雪連。汀洲杳難測。萬古覆蒼烟。

送安法師

出郭見落日。別君臨古津。遠程無野寺。宿處問何人。原色不分路。錫聲遙隔塵。山陰到家節。猶及薰蘭春。

寄靈一上人初歸雲門寺

寒山白雲裏。法侶自招攜。竹逕通城下。松門隔水西。方同沃洲去。不作武陵迷。彷彿遙看處。秋風是會稽。

夏日閒居

無事門多閉。偏知夏日長。早蟬聲寂寞。新竹氣清涼。閒對臨書案。看移曬藥牀。自憐歸未得。猶寄在班行。

老將

鬢衰頭似雪，行步急如風。不怕騎生馬，猶能挽硬弓。兵書封錦字，手詔滿香筒。今日身憔悴，猶誇定遠功。

秋閨

秋風窗下起，旅雁又一作南飛。日日出門望，家家行客歸。無因見邊使，空待寄寒衣。獨閉青樓暮，烟深鳥雀稀。

山中春夜

寂寂春山靜，幽人歸臥遲。橫琴當月下，壓酒及花時。冷露溼茅屋，暗泉通一作竹籬。西峯採芝一作伴，此夕恨無期。

訓浙東元尙書見寄綾素

越地繒紗紋樣新，遠封來寄學曹人。便令裁制爲時服，頓覺光榮上病身。應念此官同棄置，獨能相賀更殷勤。三千里外無由見，海上東風又一春。

贈項斯

端坐吟詩妄忍飢，萬人中覓似君稀。門連野水風長到，驢放秋原夜不歸。日煖剩收桑落葉，天寒更著舊生衣。曲江庭上頻頻見，爲愛鷓鴣雨裏飛。

題故僧影堂

香消雲鎖舊僧家，僧剝殘形半壁斜。日暮松烟寒漠漠，秋風吹破絳蓮花。

弱柏院僧影堂

弱柏倒垂如線蔓，簷頭不見有枝柯。影堂香火長相續，應得人來禮拜多。

聯句

會合聯句韓愈 孟郊

離別言無期，會合意彌重。籍病添兒女，戀老喪丈夫。勇愈劍心知未謝，詩思猶孤聳。郊愁去劇箭飛，惟來
若泉湧。微析言多新貫，攄抱無昔壅。籍念難須勤追，悔易勿輕踵。愈吟巴山卓犖，說楚波堆壘。郊馬辭虎
豹怒，舟出蛟鼉恐。微狂禽時孤軒，愈幽狖雜百種。愈瘴衣常腥膩，蠻器多踈冗。籍剝苔吊斑林，角飯餌
沉塚。愈忽爾銜遠命，歸歟舞新寵。郊鬼窟脫幽妖，天居覲清拱。愈京游步方振，謫夢意猶恂。籍詩書誇舊
知，酒食接新奉。愈嘉言寫清越，瘴病失耽腫。郊夏陰偶高庇，霄魄接虛擁。愈雪絃寂寂聽，茗碗纖纖捧。郊
馳輝燭浮螢，幽響泄潛菴。愈詩老獨何心，江疾有餘燼。郊我家本瀟穀，有地界臯鞮。微休迹憶沉冥，峨冠
慙闕縛。郊升朝高轡逸，振物羣聽悚。徒言濯幽泌，誰與蕪荒茸。籍朝紳鬱青綠，馬飾曜珪珙。國讎未銷
鑠，我志蕩圯隴。郊君才誠倜儻，時論方洵溶。一作洵格言多彪蔚，懸解無楷華。張生得淵源，寒色拔山家。堅
如撞羣金，眇若抽獨蛹。愈伊余何所擬，跋鼉詎能踊。塊然墜一作墜，岳石飄爾冒巢鼯。郊龍旆垂天衛，雲韶
凝禁雨。籍君胡眠安然，朝鼓聲洵洵。愈

春池汎舟聯句張愈 孟郊 崔羣 劉禹錫

鳳池新雨後，池上好風光。禹錫上取酒愁春盡，留賓喜日長。度送柳絲迎畫舸，水鏡寫雕梁。羣送潭洞
迷仙府，烟霞認醉鄉。陳送鷺聲隨笑語，竹色入壺觴。籍送晚景含澄澈，時芳得豔陽。禹錫飛鳬拂輕浪，

綠柳暗回塘。度逸韻追安石。高居勝辟疆。羣杯停新令舉。詩動彩箋忙。陳顧謂同來客。歡游不可忘。籍

宴興化池亭送白二十二東歸裴白劉

東洛言歸去。西園告別來。白頭青眼客。池上手中杯。度離瑟殷勤奏。仙舟委曲回。征輪今欲動。賓閣爲誰開。禹錫坐弄琉璃水。行登淥縹苔。花低妝炤影。萍散酒吹醅。居易岸蔭新抽竹。亭香欲變梅。隨游多笑傲。遇勝且徘徊。籍澄澈連天鏡。潺湲出地雷。林塘難共賞。鞍馬莫相催。度信及魚還樂。機忘鳥不猜。晚晴槐起露。新暑石添苔。禹錫擬作雲泥別。猶思頃刻陪。歌停珠貫斷。飲罷玉峯頽。居易雖有消搖志。其如磊落才。會當重入用。此去肯悠哉。籍

首夏猶清和聯句裴白劉

記得謝家詩。清和卽此時。居易餘花數種在。密葉幾重垂。度芳謝人人惜。陰成處處宜。禹錫水萍爭點綴。梁燕共追隨。行式亂蝶憐疎蕊。殘鸞戀好枝。籍草香殘未歇。雲勢漸多奇。居易單服初寧體。新簞已出籬。度與春爲別近。覺日轉行遲。禹錫遶樹風光少。侵堦苔蘚滋。行式唯思奉歡樂。長得在西池。籍

薔薇花聯句裴白劉

似錦如霞色。連春接夏開。禹錫波紅分影入。風好帶香來。度得地依東閣。當階奉上臺。行式淺深皆有態。次第暗相催。禹錫滿地愁英落。綠隄惜棹回。度芳濃濡雨露。明麗隔塵埃。行式似着胭脂染。如經巧婦裁。居易奈花無別計。只有酒殘杯。籍

青
月相和居易噴雪縈松竹攢珠濺菱荷禹錫對吟時合響觸樹更搖柯籍照圍紅分藥侵堦綠浸莎居易
日斜車馬散餘韻逐鳴珂禹錫

張司業詩集世所傳者有歷陽盱江二本咸編次不全番陽湯侍講司諫中迺以家藏元豐八年寫本刻而傳之其間編什頗多於二本辛酉歲余移告家居因合三本校之得其樂府古風近體詩共七十九首錄于昆陵蔣氏刊本後錯字亦稍爲正惜未能盡去也余嘗觀唐史稱司業爲詩長于樂府多警句白太傅讀其集賦詩曰張公何爲者業文三十春尤工樂府詞舉代少其倫而姚祕監又贈詩曰妙絕江南曲淒涼怨女詩古風無敵手新語是人知其爲當時所推服者如此迨后若張文懿公最重籍作荆公絕句云蘇州司業詩名老樂府皆言妙入神其爲異代所稱仰也又如此然則司業之詩是可遺其一耶今增定之則滄海之珠庶幾無遺延津之劍得以復合非敢附于四公之後也七月既望識

中華民國二十七年七月初版

(31133.1)

國學基
本叢書
張司業詩集 一冊

每冊實價國幣貳角

外埠酌加運費匯費

撰者 張籍

發行人 王雲五
長沙南正路

印刷所 商務印書館
長沙南正路

發行所 商務印書館
各埠

(本書校對者潘其璣)

嘉

82
112388

